

絡緯吟小引

絡緯吟者余細君徐所作也細君
生而孱幼善病、輒稱劇願性頗
多慧剪綵刺繡不習而能父母絕
憐愛之不欲苦以書史銘繫之務
曰是笄髻者習為婦身豈欲搵不
律應秀才童子科博青紫榮者耶

少長間從女師受書輒以病廢經
年無筭月親筆札一以紫硯集成
石田矣筭而從余：時為諸生雖
屈首以車乎然間以吟詠自喜細
君從旁觀焉心竊好之弗能也迨
余舉賢書偕計吏上春官而細君
間居寡寐無所事：漫取唐人韻

語讀之時一倣效咿唔短章遂能
成詠父母見而憐之輒稱善乃雅
不欲示人藏之篋笥余歸而碎錦
滿奚囊矣余曰何不遂成之從此
汎濫詩書上探漢魏六朝下及唐
之初盛已而直溯三百篇根源遂
逮楚之騷賦幡然作曰詩在是乎

然又不能竟讀不數行頭為卷
執卷就卧思之移時似有所醒於
書不能記憶亦不求甚解而多所
悟入如禪宗之不以漸以頓也顧
獨不喜子美而私心嚮往長吉曰
子美雖號稱大家乃中多俚俗語
初學效之不免入學究一路長吉

雖鬼才然恠、奇、語多自創深
求之上不次漢魏六朝而淺摹之
下亦不落中晚豈至庸鄙開宋人
門戶耶吾寧伐山而斧缺毋牙慧
而鉅釘故其為詩多師心獨造無
所沿襲即一字經人口吻輒棄古
弗用或時涉生澀於文理有所疎

謬弗顧間吐一語雖耳目創驚而
暗諧古調譬之天籟自鳴音響成
韻又如田夫里姥作勞相和輒中
聲律豈敢謂擊轅之歌有應風雅
然無絃動搯無孔度曲壹似有風
因者焉或謂之曰女子不事櫛
緝於纓箴管線繡而顧搯弄柔翰吟

詠景光棄而蘋藻母乃非割乎余
曰若然則古曹大家漢史班婕妤
執扇詞徐賢妃諫疏盡成罪案而
所稱姬姜太姒文母伯姬必目不
識一丁者耶然則葛覃卷耳諸篇
又何以流傳至今也細君曰不然
余少而多幽憂之疾父母雖不欲

困以詩書而深慕古賢姬名媛英
敏明慧似不欲余作憎寐人余竊
窺父母志而思成之不幸失我怙
恃遭家不造哀思無所寄故託之
為什自陶以抒寫其抑鬱無聊耳
豈真欲學古之人彤管流芳者耶
且余性不敏不能十日織一縑五

日織一素以佩悅獻滌及事我姑
嫜而聊效嗑風把葉作絡緯悲吟
以自比於織婦機杼徐吾燭影庶
幾於藉口季氏之婦而解免於山
上靡蕪乎余曰有是我余細君得
以鉛槧代機杼幸不為東海嬾魚
燈矣乃葺其稿付之剞劂以無忘

敬帝而顏之曰絡緯吟識所志也
萬曆癸丑冬之日吳郡范允臨長
倩氏書於蒼壁齋中

徐姊范夫人詩序



有謂閨闈之間不設文字耳食扒紈
扇香茗而下蜚聲鉛素幾何人然後
來者其學多不月而日縱然脂弄墨
祭可奪七襄曉未踰軒戶詞未離粉
澤求其研精博思訪關文而采逸記
什罔一至叙為獨解之語鳴節竦韻

非阡非陌百固一遂使稍具鬚眉老
縱橫壁壘如蛟之奮螭之躍帷房人
嘯嘯而無敢進盡覺軍中之鼓不揚
真足令雙蛾短氣則余獨河漢於范
夫人詩夫人生於吳氏徐實維太僕
公首女吾姑之自出也翳歸長倩范
先生范先生香名滿人耳叡心遠暢

苻采朗澈秋林競尊之為彛鼎鄉與
余論詩取林六代遡源黃初以眡季
葉操觚家少當者顧夫人詩一出輒
彌日嗟賞謂非復人巧可及夫人少
受內則諸書一往叅詣便足明通吾
家大宗伯以為金聲吾家小宗伯以
為玉亮吾姑暨太僕公尤絕憐之歸

夫子於書益無所不窺盈天下閱錄
竒草過眼盡可彊識慨然而歎煅鍊
神明佛聖立致况聲詩童子技獨無
牛耳我曹乎於是始治詩其於詩也
絕不喜唐以後言凡為五七言近體
者五之一為五七言絕者五之三其
氣局神澤微開元諸名家弗師也為
樂府為五言古為七言歌行者亦五
之三則獨規摩於長吉王孫賀賀之
為詩也吏部束帶於鞅掌梵天索記
於玉樓杜京兆以為騷之苗裔迺微
惜其理不及騷其說小有利鈍而夫
人雅癖嗜之斷以為天地間必不可
無之觀長吉政不必不死即不死不

能少加於理即奴僕騷可也史而宋
佻而勝國膚而長慶二家界而晚文
不經竒何以垂後吾寧之綺勿史寧
之森勿佻寧之棘而峻勿之膚而界
寧滅景而更駕勿齷齪而隨人轅下
恒有所造熾香宴坐窮想者竟日夕
囊括區寓飛走湖海電奔而鬼騰形

嗒然如欲廢不縱神于俗所不經之
域不自休羣婢子言夫人體故羸未
任勞苦日者藥竈未冷煙是區上者
而漱精乃爾耶夫人顧咲弗之應也
益精治詩不襲其為絕也蓋賢乎其
為近體也其為樂府古歌行也蓋賢
乎其為絕也迺其為長吉也更賢乎

其為開元諸家也。今二十年篋中所
鳩者，具在鏃上，無能不新。楚語人涕
恨語人醜，快語人舞，韻語人香，幽語
人寒，雄語人為之膽，張逸語人為之
肉，飛誕語人荒忽，乎無以自持。千詭
萬變，環焉無倪，竭夸父所未能，逐泰
皇所未能，馭辟之星宿，河湟崩潮，飛
瀑曾不得正目視。而太白蓮華踞雪
中，雲半人罕攬，而登焉亦異矣。執抑
李氏姊語長吉，恒從一奚奴騎驢負
古錦囊，遇有得，即書投囊中。及莫歸，
非大醉必疊紙，足成之。其矜茜寶艷
率如是。而吾姊范夫人隨其夫子宦
游，四垂而石城，而蕪陰，吊古中宵酸

風射眸觸境成詠鬱為名作最其後
萬里入滇溯大江而道黔巫滇山水
為西南險絕金馬碧雞陳蹤宛在極
波濤之所訇磕煙雲之所吐欲神鬼
之所翕闢猿鳥之所斷滅無不從翠
幃中領略其喬詭瓌瑋可駭可怡之
概而出之為驚人鳴其所得較驢背

果何若以故長吉所有者可以窮一
世而不足窮夫人越而尋之諸名家
所有者又可以窮長吉而夫人亦不
為之窮藉令當世名彥劇心刻腎何
能據夫人牙後慧即林或相遠而俗
腸膠擾中故未易辨此嗟乎古來閨
秀代不乏大率鮮得其執雖飛絮謝

庭猶未能忘恨於天壤青霞鬱意識
者撫心維泐與嘉庶膺此選以長倩
雄才故自兄嘉迺夫人亦何至娣泐
千載兩徐譽決無恨夫非窮古快事
邪夫人每春秌後日不作組紉斯時
也一室之內荀香何粉相敬如賓或
迴欠鼎唱揚於今古或亮月半天川
巖在覽或名花照檻節序關心每拈
一題夫子輒疾書之流出人間高下
傳寫慮無不各有一通也者奚必備
響於高名之士乃足振於而涼也焉
問叙於不譚不謚間者此胡然非第
能詩人不得索解人亦不得解之者
隴西董斯張也能叙者也董生者夫

人中表弟也得叙者也迺是刻也長
情實力強之故非吾姊意也

隴西董斯張遐周書

絡緯吟題辭

絡緯吟余姊范夫人作也志絡緯以
形管不忘組紃也試卒讀之而非組
紃間語也蔚然者與采鏗然者與音
突兀然者與骨寧創而異母勦而腐
固已謝玉臺之靡響繁錦囊之奇句
即今之號稱名家度不能驅乘而先

鞭矣吾吳文士衰落獨姊與趙大姑
相賡倡駸。作者豈一時清泚之氣
不在冠弁而在笄禕耶余因稱曰夫
笄禕何必遜冠弁也詩歌神物巧濬
心靈當意所自得造物不能與謀或
冠弁而靡或笄禕而振要以巧予天
專予習專而奪巧而神化莫之或知
也曹子桓稱文章經國大業不朽盛
事而楊子雲至薄雕蟲小技壯夫不
為子桓父子臬雄命世鬱國鼎而食
之不饜廼猶津。此道橫梁不忘子
雲玄亭間窳鑽厲窮年剝腸濡首頽
反薄之夫豈欺我洵中有鬱勃不得
已而托焉者也大都文人之志牢籠

天地殫壓山川惟其所揮斥欲為而
間或牢騷詘抑抒情寫態如千丈之
瀑騰空而噴薄遇隘而激射直障遏
之不得故文不期工而自工今夫深
閨之彥饒丈夫奇槩不能蹕厲風雲
第以帷房數尺地當寰中五嶽海外
十洲而三寸弱管為芒屨躡幽窮仄
下上今古忽割然天高地迥之表奇
藻絡繹庸詎不烈于鬚眉其肯以鉛
華泆忍乎哉吾姊沉嘿貞靜志操不
減桓少君而才識殆過阮新婦祗哀
蓼莪傷陟岵感憤憂思勃無所發廼
發諸長吟短咏而間廣其篇什是亦
以薄之不為者姑為之于有所托倘

猥與班姬左嬪輩並舉而爭葩競藻
猶之淺窺吾姊矣姊斂容曰子惡乎
言操觚非女子事余蓋無心而游戲
者耳且余既奉白業是綺語障將母
為瞿曇氏所訶梓非余意也夫以志
余過可也

弟洌仲容甫題

絡緯吟目錄

卷之一

賦

續春思賦有序

臨蘭皋賦

楚辭

傷往

遙夜辭



桐花

懷遠

四言詩附

詠芳草

題贈燈

卷之二

五言古

閨思代董氏弟婦作

贈滿妹

懷弟

送益年伯母還楚二首

夜雨感懷

賦得送遠兼憶故廬

適外出所題署中積雪感懷詩知其胸

次之鬱鬱予書此以贈少足解頤署

中有小園故藉此以充一劇

秣陵弔故宮

寄答外

贈女尼

題贈燈畫

題自製燈帶

壬子仲春三日過支硎山舊寓為人所
據承二姪婦見留聊用為贈
邯鄲才人出為廝養婦

神仙曲

卷之三

七言古

燈宵曲

湘神曲

神絃曲

前行路難

石城暮

秋夜效李長吉體

中山孺子妾歌

早春二首

後行路難

贈趙夫人

秣陵獨坐感懷

大江行有序

寄懷趙四夫人

鳩茲官舍謠戲嘲長倩

弔蜀孫夫人有序

梅花落

滇寓邊城被警

秋夜篇

天上謠

春閨引

石城美人春游曲

駿馬行送仲容弟北上

四時歌行

弔節婦茅母居夫人

新蓋公解小齋園池成漫賦

夏曉

送人歸吳中

初夏曲送孀母歸吳中

宮中樂

德美人鳴琴歌

效古襟曲

贈沈姬瓊樹

題扇上秋江送別圖為周姑母老夫人

越中偶成

山神吟

寄贈孟夫人

書文夫人扇頭

壽陳石泓縣公太夫人

悼親詞有序

贈歌妓安卿

卷之四

五言律

游山莊

咏鷺

家園對雪

登一雲山

贈女鍊師

飲山莊

咏妓

贈滿妹

早春三首

戲贈表妹合歡詩三首

七夕三首

牛女二首

詠梅二首

中秋夜坐望月偶成

送長倩三首 并序

游梅花塢步長倩韻三首

酬趙夫人前韻三首

詠美人雨中觀荷二首

亞歲

五日二首

送孟年伯母還楚二首

寄懷趙四夫人二首

寄懷四弟

宿草

浮萍

歸雲

秋夕即景二首

屠舅夫人以扇索詩奉寄

飲趙夫人山莊二首

飛月

舞雪

寫懷

卷之五

五言排律

酬贈曹夫人

園林同表妹坐雨

贈弟婦葉娘

贈潘娘

家園即事

枯樹

贈美人

前題

獻歲一日有懷趙夫人却寄

賦得衰草詩用侵字韻

又賦得芳草步深字

寓邊城兵靖作

卷之六

七言律

題山中古墓

飲山莊

石湖

游徐氏山莊

春日白下即事兼留別諸親

渡江

過龍潭驛口號

感懷

壽從嬭母二首

九月望家報不至聞邊警

送長倩游西夷

重酬前韻二首

至曲陽樓偶成二首

過貴陽道中

家園即事

壽大姆五十三首

金陵道中有感偶成

效古塞下曲

渡蕪江望月夜坐聞風舟中偶成二首

看梅小苑懷曹娘二首

題垂柳二首

行清溪洞有感

早春

卷之七

五言絕

秋夜二首

觀化二首

曉步三首

游女二首

春日家園即事

眺支硎山二首

贈麗人四首

擬陳思王七步詩

寄團扇與表妹

早春對雪憶弟七首

題山水圖

紅蓮二首

客舍獨坐四首

雨中花二首

題大金吾劉夫人扇

夢中聞亡親栽蓮感大士作五首

卷之八

七言絕

行茗溪即事二首

寄懷丁氏妹

春游

贈姑母

舟泊虎丘二首

虎丘懷古二首

春日

代閔娘閨思四首

寄表妹周娘二首

戲贈歌妓三疊五首

秋夜三首

送邵妹北上二首

泛茗溪四首

送長倩夫子北征五首

詠宮人曉妝三首

宮詞四首

近宮詞四首

塞下曲五首

官怨六首

重吊孫夫人六首

採蓮曲十二首

竹枝詞四首

柳枝詞五首

題山水圖代外作三首

代姬人春怨

遊仙詩十首

題園中竹四首

贈從弟仲容北征五首

揚玉環五首

燈夕偶成四首

贈薛素素五首

贈琵琶衛娘二首

題籬邊菊

蕪陰晚眺

金陵弔古二首

將去金陵別東鄰諸老母二首

題瀟湘八景

詠繪圖八景

班婕妤二首

明妃詞二首

金陵留別叔母三首

留別金陵官舍九首

別孤弟六首

繫舟毘陵道中月下憶兒婦四首

別曹娘三首

除夜宿客邸懷兒婦四首

舟過麻城懷大金吾劉夫人三首

蒲圻道中兩

桃源詠古二首

滇中曉望

寄懷

寄贈年家妹二首

元夕四首

明妃三首

答趙四夫人却寄七首

寄懷孟年伯母三首

贈孟年妹花燭詞三首

塞原秋晚三首

七夕五首

七夕望家報不至有感

聞邊城兵靜喜賦三首

滇南別馬夫人三首

行清溪洞有感三首

別馬小夫人二首

行山中看雨後花四首

題飛雲洞二首

飛雲閣禮大士

題贈趙四夫人壽圖

賢姪娘子以扇索書戲占口號二首

贈美人并序

寄女姪哭其先慈六首

送表姪女吳夫人北上二首

遊舅氏山樓有感二首

寄萬娘五首

壽仇母五袞

泛舟翫芙蓉偶成三首

贈金卿雲

泛西湖經西陵弔蘇小小三首

見隣舟美人戲成三首

贈馮師母老夫人二首

送遐周弟北上武前韻六首

遊龍井滯雨漫成三首

寄孟四娘二首

壽申老夫人二首

春日四弟招飲舟過虎丘同諸母席上

偶成感懷似安卿娘子四首

送溫老親母夫人北上五首

卷之九

詩餘

過采石題蛾眉亭調寄霜天曉角

石湖弔古調寄霜天曉角

步韻咏吳延陵郊居小齋調寄漁家傲

九日泊舟豫章道中調寄霜天曉角

卷之十

詞餘

春日書懷調寄綿搭絮六首

春思調寄綿搭絮四首

桂枝香寒夜書愁三首

啄木兒感悟仙遊四首

感懷追逝南北調一套連尾十首

四時寄生草四首

四時江兒水四首

二郎神一套連尾五首

卷之十一

序

送孟年伯母還楚詩序

傳

林母徐孺人傳

頌

性明師頌有序

大士頌有序

又大士頌

趙夫人壽頌

于貞姑頌有序

復作大士頌

孫夫人頌

誄

先人誄

悼詞

悼冢孫文

祀文

祀湘夫人文有序

祭文

祭屠叔母老夫人文

祭庶母文

卷之十二

尺牘

與姑母夫人

與表妹邵夫人值予與妹俱旅白下
奉候叔母

訓子

錄詞寄從弟夫人

書仲容弟游棲霞寺詩後

與仲容弟

勗弟并呈諸母

寄叔母

與董遐周表弟

絡緯吟卷之一

東海徐媛小淑氏著

賦

續春思賦有序

於時春也游乎江涘感條風之扇物悵吹萬
之不齊喟然興思援筆為賦昔龍門年少玉
藻揆天鬱彼羈懷綴茲高響既析字而成珠
亦汎聲而當珮後有作者吾無間然至於繡

閣雙鬟幽懷萬緒經春濺淚理非一端得無
有留欲吐之章俟後來之秀者乎予本恨人
驚魂無定載成斯製廣寫幽憂可謂千古傷
心一時遙集者矣其詞曰

遡長流而進擢駕日彩以浮梁雲濛濛兮輕曳
烟靄靄兮微揚維時青帝司晨女夷節鼓鶯竊
吳歛蝶翻趙舞碎銀沼之萍花散玉樓之冰柱
氣暖平原香繁別浦欲流月姊之輝未值風姨

之怒冶遊則拾翠採珠竒樂則沈宮振羽嗟哀
樂之致懸匪一理之可研類啣傷於暮序或撫
心於綺年境何觸而非恨淚何人而不泉若闕
外之殊悖羗難得而備宣也至如金屏椒壁繡
栢瓊礪若有人兮閉其中步徙倚兮私自惜簾
捲水精枕留琥珀風斜轉而吹奩月孤生而照
隙艷朱謝脣輕黃罷額池桃空紫石苔長碧羊
車過而塵杳鳳吹繁而院隔何遊絲之似繞更

落花之如擲舞驚鴻其已緬慰真珠其奚益乃
天遠之鳳子適月竈之烏孫三月雪飛萬里晝
昏星懸漢影笳折胡魂駭驚沙之無斷傷芳草
之盡髡俗侏僂其難接色蕪絕而不言登別館
而凍雲集眺荒野而苦霧屯羶鄉侍寢羶酪當
殮臆中鳩鵲之觀夢裏蒼龍之門睇故國兮無
日知天子兮少恩亦有少小容華生來婉弱笑
非蔡而羣迷腰未楚而先約芳菲菲而入宮黨

訛訛其謠詠君意不自堅君恩俄已落脩成之
肉可糜新人之鼻幾斲鬼帝誰叩皇孫欲啄勢
甚撓推危踰巢幕恒撫節而骨銷轉當春而神
索別有便娟銅雀妓漳水東來寫姿媚俱照渚
而成蓮各臨風而拂翠窳窳玉喉翩翩繡袂旋
娟為之氣奪洛珎因之色墜值君王之未疲洎
賓筵之半醉態轉裾迴魂挑眼刺雕閣黛浮璜
臺香膩守宮之血未乾辟寒之金爭餌痛尊酒

其寂寞空西陵之歌吹駘蕩青陽悽焉雪涕况
乃初歸瑤鏡慣畫青眉忽河關其遐別邈烟路
而安之琅玕結意勺藥贈離舉邯鄲之翠袖泛
蘭陵之淺卮君啼妾拭妾臂君持孤舟尚艤短
篷乍吹草縈情而磴礙柳帶恨而橋垂寫素懷
於石闕申丹款於炭屨渭水波兮代咽越鳥吟
兮助悲故歡亮已矣良晤終何期及夫秦生赴
椽細君未從將千里而同子何二豎之留儂一

則故廬善病一則天涯浪蹤鏑茶夕冷杵藥晨
春錦衾橫而鑪氣歇華燈燦而樓影重憐琴心
之別鸛妬鏡背之蟠龍夢遙尋而難寄書促往
而忘封對此闕闕鳩語灼灼花茸何嘗不抽簪
覺短約帶憎鬆予美亡此誰適為容是以新光
新氣新景新愁固千悲而一族亦異感而同憂
莫不寄微情於湘女結幽恨於靈脩豈與夫康
娛漂殘流連桂舟艷曲平原之第巧笑如臯之

遊夜以繼日忽忽悠悠者哉重曰菴蘋既已廣
紅蘭亦已長浩空江兮無人邈予心兮愴悅復
鷓鴣兮先鳴撫歲華兮將往寧攀雲際之瓊枝
不願河洲之宿莽有韓娥者聞此辭乃抗音而
奏陽春之歌歌曰魚澆澆兮鳥綿蠻逝白日兮
銷朱顏蕩許春愁終不去解許春懷終不閑詎
怨多而心死直歡餘而淚斑欲知妾恨復誰是
破盡雙蛾不似山

臨蘭皋賦

縱目平川襟英繽紛晴巒染翠蒸霞吐氛於時
夷猶徙倚遐眺怡神鶯簫咽夜鼙鼓喧晨爾乃
倚楫俯流命酒賡詩黃鳥翩翩白雲離離青萍
軟葉碧柳綿絲遼西語燕武昌遊魚璇閨春暖
玉塞寒舒滯行子於天涯望征人於絕域講鷹
決起牧馬肥澤煌煌羽蓋隱隱旌旂日華飄彩
素月流輝林散紅桃水芳綠蘿斯時也或驅寶

馬而徇翔或駕瓊輪以遊嬉或邀靈於洛汭或
紉佩於湘湄鳴雕鐘於睇澤沸廣樂於咸池集
有名賢坐無俗侶羣譁浪以抗高雲澹容與以
遨川嶼桓伊之邃奏劉靈之觴舉量溟渤以為
酒衡泰岱以為鬱羅萬象於瞬息和造物於天
倪極娛樂兮迎上春列游駟兮來下里曳曳蕩
輕衣珊珊揚雜珮望遙路兮驚春獨予情兮悲
涕有草兮萋萋有鳥兮差池徑苔兮蕭瑟庭花
兮離披已矣哉春光媚兮秋螢飛春華燦兮秋
露晞滄桑詎可定綺羅無復依聊抒情以寄恨
結長風以東歸

楚辭

傷往

傷往悼董三弟也

駕輕舟兮木蘭泊輕風兮袂單望湘水兮生波
藹瓊樹兮闌珊聞激管兮思結聽啼狖兮眉攢
歲不與兮倏倏情一往兮增酸悲白骨兮杳渺
魂其歸兮路漫追鴈行兮宛昔何一旦兮摧殘
去不返兮勞想行不歸兮晤難嗟人世兮寄跡

復愁緒兮千端傷吾生兮太息聊容與兮江干

遙夜辭

丙夜夢鉉兒牽裾有懷作遙夜辭

良夜迢迢兮天高露垂中庭寂寂兮驚鳥倦翹
懷憂獨坐兮譙鼓聲悲徐步廣除兮苔痕履綦
寒生膚粟兮飄風亂吹攬衾伏枕兮夢汝褰幃
含愁凝涕兮念汝乖離低徊結思兮謂汝來斯
撫之摩之兮柔情暗馳掬之勞之兮宛轉追隨
回身就兒兮驚魂自疑驀然覺來兮竟爾安之
我今憶兒兒豈知肝腸慘惻將告誰心搖目眩
會何期願同黃鵠兮棲故枝

桐花

桐花贈楊姥也

桐花飄兮秋風涼水溶溶兮白蘋香延佳賓兮
列高堂泛層波兮皎夜光彼一人兮髮蒼蒼紉
幽蘭兮被霓裳吸石髓兮泥瓊漿飡金英兮沐

華芳今夕何夕兮共徜徉聊容與兮芳草塘携
素手兮步踟踟祈歲歲兮樂無疆

懷遠

懷遠寄長倩也

胡風勁兮慄裂寒楓葉飄兮征衣單路迢迢兮
遠去水揚波兮聲潺湲對草木兮悲落莫望關
山兮鬱盤旋日黃昏兮絕綦履夜杳渺兮傷愁
顏攬三星兮間河漢援素琴兮鳴朱絃浮雲漠
漠兮扁不舒玉露涓涓兮夜溽溽聊逍遙兮步
庭際窺明月兮空懸白日忽兮愁淹莫房攏闌
兮風冷然沙鳧宛頸兮泊洲渚玄鶴噉噉兮舞
駢環托晨風兮寄尺素情脉脉兮曷勝言

四言詩附

詠芳草

歲首陽曦綠蔭蕤飛光散靄露彩朝施江南
碧華絕塞縈絲璇閨結思征途馬遲上山盈掬
極目天涯絡繹郊園尋芳錦堤還思消歇涼生
素颺蒨澁枯香葉槁柔滋寧似春松不厭霜欺

題贈燈

雲輝火樹月暖星球上元雅會春林宴酬椒盤



絲絲吟
香覆栢釀光浮

一
卷
十

絡緯吟卷之二

東海徐媛小淑氏著

五言古

閨思代董氏弟婦作

芊芊河渙草柔條媚芳堤爰有深閨妹對此復
含思長風從西來飄飄入重幃攬衣步中庭視
彼夜何其衆星歷可數涼月吐華姿瑤尊飛玉
霜寶瑟掩塵絲君子遠行行誰復施膏脂曷言

長安近眇眇天一涯
巖風沙皚皚流水波瀾瀾
容與凭虛闌白雲窺戶楫
顛假晨風翼折贈以
丹莢

贈滿妹

我妹才弱齡瓠瓠失所怙
孝思永不諼哀號徹
朝暮睽彼松栢枝冰暑不易故
痛此衰年親忽
馬委朝露繁憂摧肝脾
陴隄傷心慄零落芙蓉
珠碎滴梨花兩帳額怯春眠帶
眼寬秋素落葉
舞空庭淒風起遙路魂隨楚水
招夢逐吳雲度
聊共北堂萱忘憂保歲暮
嗟哉幼女賢曹娥能
儷步豈獨希令儀令德世所慕

懷弟

一巢棲二雛一枝舉雙子
倏焉迅風激傾顛失
所恃骨肉相胡秦中庭忽張矢
陽春不我顧苔
綠潛堦圮

送孟年伯母還楚二首

徒倚北梁心悵惘携手步寒塘蕙草枯幽徑芳
蘭暮恒絕武昌鱗恐蹇衡陽羽何以慰我思永
持金石固

其二

聚散儼蓬飄幾欲論心悵辭短意自脩河廣蒹
難渡良會怒朝饑殘暉挂西樹嗟彼秋蘭姿零
落在中路

夜雨感懷

石堦繡水痕幽風掃朱草青雨夜飛來白雲滿
山老沉默結暮昏暗壁淒蟲叫起坐諷南華強
顏動歌嘯輕霜滲鬢絲懶容盈鵲照昔事了無
影轉盼幻虛漂漢帝思凌雲西王傳秘道一朝
抱土眠千秋冷孤廟惟餘紙上名枉覓長生妙
勞勞一寸心脉斷愁秉弔

賦得送遠兼憶故廬

岸柳茁短絲星舸劃蒹蓼養花二月天瑟瑟春

寒小歸幙掛輕綃征帆拂畫鳥霞吐野郊晴月
寫汀洲皎咽咽送行人饑腸怒如搗客帳夢青
山羈心徒草草

適外出所題署中積雪感懷詩知其胸次之
鬱鬱予書此以贈少足解頤署中有小園故
藉此以充一劇

拔土出泉白編籬插野草稍籠晚翠竹柵瑣
苔紅古石平郊聚橫塘帖水蒨栢花開小綠細

柳發寒墉沙色吹浮媚烟光澁影空幽城微角
弄小寺遠來鐘瓦甃燒松葉山杯截碧筒作吏
三年整離家千里中請纓觀上國索米向天宮
茂苑悲秋客短笈貯書翁醉來還自笑遣興步
墻東蕙帶飄香素囊琴東小桐倚欄追旅思危
坐挹微風綠知今夜裡月色故園同

秣陵弔故宮

秋壁枯蝶灰荒丘填古人陰松閉幽宮走犬相

信信白景寒風蕭野霜上苦榛桐柱消土脉果
愚結杞莖翠殿從烟飄畫鼓沉晝昏遺香碎象
口守宮冷血痕花房平烏足桂寢濕螢生瓦礫
抉鼠毋空桑捕蛇孫乾石卧魑魅笑聲起碧燐
古水黑如漆老蛟齒列銀跳汰截曉涎暴背豎
錦鱗南原曠號號靜夜無行人健犢耘泥膏壯
夫排隴耕今朝種陸地昔日瑤臺春不須春白
玉安用餌黃金渠似淮南客相牽翔白雲

寄答外

暇豫倚危闌徘徊步幽砌緬想同懷人渺焉去
京薊翠閣冷霞飄華燭金屏蔽雙影乍商參孤
踪浪迢遞舉檝川無梁盤山路難際層城迷道
軌交河阻津滴浮雲鬱不舒白日就西逝睽彼
洲上鴛依棲若相次顧此天際鴻翱翔共揚厲
風雨驚離羣雲泥無異志富貴亮非真素心誰
得似積思對芳辰懷愁坐消歲空有尺素書脩

途夢魂滯何日結駟還共雪牛衣涕

贈女尼

事事領出趣探玄來上方邂逅逢靜者嫵娟澄
素粧燔香友脩竹趺坐披瓊章遁跡煙鳥外鍊
神雲水傍攀荷圓作蓋採薜巧為裳玉樹颺奇
來摩尼搖異光志寂洞微理機忘入悟鄉慧燈
懸不夜法海津無航細草綠堦長名花拂袂狂
寒雲觸石起暮靄浮青蒼空餘明月夜孤磬冷

松房

題贈燈畫

翠樓春氣馥璇宮桂影團玉斧香霏雪霓裳度
廣寒青帝臨韶節花神獻早蘭

題自製燈帶

玉海冰輪上雲生水氣收影曛春草色光暖洞
庭秋萬國盈鳩鵲千城不夜樓

壬子仲春三日過支硎山舊寓為人所據承

二姪婦見留聊用為贈

卮酒汎春烟林嬌翠色聯為憐花信晚聊取杖
頭錢瓊枝不寄雀玉樹有啼鶻子夜絃歌緩蘭
缸寶焰偏盧家新燕子王謝舊堂前嗟我南飛
羽勞卿地主賢

邯鄲才人出為廝養婦

傾國有佳人言自邯鄲里十五揚青蛾含嬌理
文梓茜服炫朝霞芙蓉鮮步底一旦離璇宮啣

啼歸監子舞影向風翔歌珠壓塵死腰裊羅帶
寬香膏逐漳水昔者奉音微芳華衆所歸今來
驟衰謝羅綺夢中稀君恩豈飛露傍草畏朝晞
神仙曲

海上坐神仙囊沙籠紫鉛割石藏丹書熬松生
古烟飛來雙白鶴宛頸食青田鳳簫吹夜月雲
磬激重玄走天驅玉鹿拂水着金鞭南山採空
碧北嶺摘香荃雞呼華屋曉犬叫白雲閑玄芝



國家圖書館, NATIONAL CENTRAL LIBRARY, TAIWAN, R.O.C.

盤裡綻玉棗袖如拳醉來乘皓魄三十六卷前

絲絲

絡緯吟卷之三

七言古

燈宵曲

春風吹雲生晚晴空光曳練飛弓棚官街馬蹄
踏踏行玉壺漏箭鳴丁丁華燈九枝排龍檠吳
兒傀儡鬧雕棚月綴金鋪素影呈沉香火底鳳
簫橫倡樓怨婦思不禁花裙步蹙蘭茗萌雙環

東海徐媛小淑氏著

國家圖書館 NATIONAL CENTRAL LIBRARY, TAIWAN, R.O.C.

垂耳夜珠明牽鸞拖珮闔腰輕挾箏抱瑟發清
聲高山停雲飛鳥平神魚躍浪波臣驚歌成一
曲酒數觥倒瀉銀河水一泓

湘神曲

蒼梧古竹斑斑紫湘神淚語湘江水怨鵠離鸞
跨碧空九山凝翠愁雲容半夜蛟龍起呼跳嬌
娘珮冷江珠耀江花靜綠濕秋風高天挂月光
朧朧

神絃曲

揚旛片片飛雲橫筵開水陸列綺楹曼睩蛾眉
弄紫笙邀將萬騎臨朱甍紺幃翠葆踏空生雕
輿花竿子牙行玉爐蒸火烘烘騰銀錢窻窻悲
風鳴山盃酒花甘露盈瓊脂龍髓繞座呈檀槽
文琵琶振振神兮嗔喜師顏驚西陵日沒景倒
平神之歸來薄霧迎盤山曳沼清風冷

前行路難

君不見長安城凍木皮裂白狼渡頭三尺雪封
狐口截三寸舌黃河泓彪大如山行人畏之雙
足截酸風瑟瑟瘦馬楚野霜離離捲車轍六街
浩蕩無主人壺中喚天白晝噎我有蓮花袖中
鐵七尺龍文雲影決長驅欲往截羗胡風烟忽
起弓刀折啣恩俠士衷心熱報國從來肝膽烈
群犬信信吠九重爭先欲噉生人血澤畔行吟
悲世艱成都賣卜甘藏拙男兒寧竒窮兮顏不
屑且復學劉伶閉關覓斗酒更安忍使務光之
真穢泥涅

石城暮

雨工掃白雲吹作吳江水凌喧噴城堙女垣饑
烏委大野風號號輕縠簾籠起畫幕掩虛櫺紅
油刷踈綺娼婦立中幃嚙娥嬌不已上客解投
轄邯鄲出文梓柔指撥冰絲飛來雙鳳語鈿吐
碧雲翹釵帖丹鷺尾帳羅薄蟬垂茵橫隱花蟻

裙翠織青葱襪刺湘紋漪撼玉晚臨粧行行映
花底膩燭盤蠟黃月浸烏衣里午夜烏衣月色
洗留都少年金陵美龍腦燒烟入縷飄背把香
丸落鷹子走馬章臺院院春蝦蟆陵下雙雙女
老大蛾殘淚粉黃油壁車闌枯鬢光蘇小西陵
松栢下水珮寒敲暗夜霜

秋夜效李長吉體

紫臺孤烟掃白壁綽綽餘涼動瑤瑟一葉桐飄

驚素秋絡緯聲悲風浙颺紅蘭凝露胭脂泣古
槐霜飛影圓魄思妾深閨聽暮砧剪裂齊紈響
刀尺歷歷星橫駕鵲橋嫦娥桂殿坐終宵穿線
月明花爛漫曝衣樓掩瑞烟消天空澹澹明河
白宛轉轆轤響唧唧木末芙蓉倚沼生池塘新
水浮雙鴨

中山孺子妾歌

泣魚要固寵悲扇斷思私霍霍春陽艷燔燔桃

李滋劃馬素秋至中道恒相遺紅葩有消歇月
盈還敝麝莫作中山孺子妾半寸織蛾千縷結
別鶴離鷺怨碧空長門夜久高明月

早春

東風繚繞吹黃葛闌干十二鴛鴦禿渡口寒凝
絲雨香卵色遙天雲影潔素塵逗烟薇帳子依
依淡靄野姿刷小石泉飛鴨綠涼滑語雛鶯啼
欲絕

狂蜂撲簾烘雲熱粧樓鬢髮香膩滑一雙碧黛
剪春山五十商絃邀夜月飛香走玉花散雪白
浦澄江波亂發素練平空萬樹齊野綠絲絲生
短髮

後行路難

蛺蝶交飛春影弄冰簾燕語銀鈎重暗柳著烟
亞短墻滿欄日色簫聲送思妾停針午窓夢垂
雲蹙枕低斜鳳梨花小幙生晝涼瑤席香葱展

象床珊瑚作梁瓊珀析芙蓉斗帳玉為廊洛陽
年少新豐舍繫馬黃金紫絲袴雙蹄合踏杜陵
花沽酒城頭不論價五侯七貴競豪奢銀闕金
九油壁車龍沙細柳將軍幙紫閣蘭臺萬戶家
吁嗟人事安可度旖旎朝華暮成落功高不數
淮陰狗勢盈空憶華亭鶴盛衰環轉浩無端滿
眼誰能定哀樂自來惟見青松根年年翠葉凌
嬌春

贈趙夫人

日南產珠楚有璞高山鳳鳴淵躍玉吳中山水
饒清輝秀出蛾眉駕西蜀才傾蘇蕙錦文詞藻
揆班姬紈扇曲白雪由來擅郢中巴人下里難
為續天遣仙姝謫九霄飛瓊姓字垂丹籙五雲
颺颺騰彩華瑤池阿母駕颺車他年共舉凌空
翼十二瓊樓醉碧霞

秣陵獨坐感懷

花飛三月韶光鮮水天淨白閑雲聯曲江兒女
紅袖掩縻曼調入琵琶絃新亭柳絮絲絲拂桃
葉渡頭漁網出歌殘玉樹憶陳王結綺香寒麗
華骨仙風繚繞謫仙樓日見鯨仙江上游鳳去
臺孤春寂寂烏衣芳草目悠悠春烟春草年來
碧王謝堂前燕雙覓畫出雲山望裡看時聞夜
月秦淮笛吾生素有烟霞癖早慕長干舊京國
六代曾傳金粉妍風流庭院青山客去年辭家
情脉脉屈指計將逾百日不見槎來黃耳音惟
聽杜宇啼聲急使我戀戀滄浪色

大江行 有序

蕪陰之西大江之左予邸在焉俯窓憑檻江
聲相聞舟楫往來雲征不絕迅風四聚陽侯
歔噉怒波瀆瀑潰澗澗橫遡蹠流截帆倒
纜則舟子漁人過客估商旅霜斷髮卧老褐
衣擯滯于荒堙或花旦蟾宵士女游兒疊鼓

鳴韶靚粧袷服髮濕花烟香生冶袖旆映蒸
霞舟攢蟻陣競游于江上予值燈夕病起無
寐塊然斗室見破月分蛾踈星漂漢聞上流
一派鏡歌鼓吹之聲隱隱嗚嗚不去耳畔遂
命婢子剪几間殘蠟磨隄糜試賦大江行以
紀其事

鼓濤翻翻吹疊練平鋪一帶紋如剪迅激驅湍
發濫觴衝流軋岸排星點海澤空涵鏡面沙葩
揚石蛙雨噴霏海月柱脚挂搔頭土肉腹垂小
兒腕蘆人春水鈎紅藥估客迎風流竹箭捧盤
鮫人澤含媚遵臯交甫沉雙璫靈均抱石賦滄
浪神龜寄夢陳漁使崦嵫轉日走玻璃璇宮月
午蟾蜍墜巨浸乾坤南紀開星躔錦帶連淮泗
潯陽月夜司馬船洞庭波上湘妃淚吳娃倚扇
障團沙群女凌波歌採芰樓船簫管咽還通綺
陌風香桃李醉江中白霧高挿天三山半控青

雲邃草暖雲昏古樹低花蟠日暄胭脂膩采石
磯頭月滿樓水澗臺空鳳凰避長干夜半秋風
姿剪碎一江帆影翠惟有津頭楊柳春年年刷
綠追行騎

寄懷趙四夫人

客年紫甸歌驪曲今春砌草萋萋綠歲蕤草色
適青黃沉華密遠無停宿美人餐霞棲石屋高
樓百尺秋烟宿鳥几香翻貝葉書朱絃韻冷青

梧木侍兒排草耕山雲夜擣瓊膏咽紅粟踏空
咲語浮天來蛾眉渡海牽玄鹿橫竹吟龍飄遠
林隔窓暗引青風逐苔封剝蘚繡金沙門垂鷺
瀑飛寒玉密影梅根花作洞分枝蠓彩枯香馥
憶昔美人搴芳洲粼粼春水明於穀何期雅會
日蹉跎江月吳雲間平陸衡陽駛羽絕迴風武
昌帛書冷鱗腹苦無脩絲懸赤日恨不魚腸截
龍足碧海澄江不斷流白衣蒼狗坐煎愁駐顏

應得長生藥揀地擬作仙人游
願掃塵颺養金骨日日油囊共爾甬

鳩茲官舍謠戲嘲長倩

為政三百有六十苦雨愁風少
乾日頽簷雨脚撒青繩流沫飄
泥土膏黑庭除水漲出鰈魚竈
底蛙行聲哈哈平堦割木編浮
槎褰裳戛袴雙足赤敗垣殘屋
蝕饑虫石脉油油沙珠滴古壁
焦塵織網絲澁灰漆膩蛇鱗圻
鑽籬碩鼠大於

拳雄呼跳梁騰空天漏深永巷
蕤鎖鳴榔夜深聞客船顛倒着
衣霜色闌腰橫半解踈星殘
清朝法鼓三撾動飛來單紙密
如蠶粉署盤飡無雅會臃豚炮
犬列腥羶黃旗大鑼震里耳塵
榻殷綺凌空懸釜魚懸磬爨烟
冷孤臣苦節凝冰堅枕門惟有
江流白那得雞香朝晚含局趣
樞中耻俗吏龐眉擣藥學神仙

弔蜀孫夫人有序

予旅卧蕪陰蕭蕭長日酸風射眸一片波光
與枕函相度牢落羈心終成懶癖病起偶得
繅磯志讀之見備載蜀先主孫夫人始末其
中諸名家所作爛然盖悼夫人之失計歸吳
自沉淵死集中灼灼有題不容復贅予獨陋
夫人之死誠識短於初後媿反何益亦有所
感夫人之靈淒楚捐衷草成俚語弔之

蜀王夫人東吳客靈祠控天椒壁赤裁雲割雨

劈鯨鯢剪浪截風送行役香纓生綰帝室耦殞
後龍淵寄貞魄神襟雄擅諸兄風何期悞墮周
郎策憑陵三國勢縱橫吳蜀交婚豈良適忍教
雙臂紅絲牽棄作竿頭鈎綆擲青銅立影照派
鷺離夢杳成雲泥隔花館空懷孫武謀侍兒徒
擁刀環嚇古來尤物自戕身蘭萎香摧象齒炙
結恨顰含隴阪烟啼聲競與江聲澹總帳灰飄
帶上花石窓鬼丸封泥射千年老狐嘯空巢百

足蛇孫鏤斷壁餓鴟窺筵竊餘供山魅漆燈起
土隙彊彘啄食獐牙張羈魂泣影青珠滴吳宮
不惜鳳枝棲恰來卧聽沙雞喙一灘孤月伴幽
宵滿棹悲歌弔愁隔灘月依人西北流關河無
計連郊陌君王古塚雲根穿夫人渡口波痕白
為爾傷心重一陳吳陵秋雨蕭蕭碧

梅花落

蘋吹輕流芳樹底春光爍灼玻璃紫二月江頭
翡翠飛冰花拂水明於綺誰家少婦傍沙堤金
剪嬌携摘一枝笑簇鬢雲粧倩色巧裁星點黛
中施洛陽少年重遊俠同來樹下相傾酌花管
橫吹夜月淒歌珠亂促行雲落樓上還驚蕩子
淚將針縷刺吳機江南花鳥紛如繡玉塞飛
霜凍鐵衣三五清光浮夜色栢梁聲遠千門黑
露冷瑤琴韻不飛霜英擲處朱絃澁止餘孤幹
瘦東墻一片空心散曉霜不向曲中愁落盡應

添帝子額間黃

滇寓邊城被警

銅鞮襟虜聚縱橫
關山夜黑征鼙驚
千騎紛爭却月陣
百蠻絡繹壘金鉦
桔槔原上飛烟色
戍樓箠策聲
淒惻風沙夕捲踈
勒昏火燎晦天崩
四極高扃空城白日下
城頭雨矢流如瀉
碧眼番酋膽氣驕
龕拳大鼻多髯者
羗奴憑凌雄勢騁
狐城倒懸將裂迸
節使先虧幕下兒
宣麻未

授將軍令其貪若狼
狼若羊奔騰殺氣射
天惶弓彎月影攀危
堞劍吐星文耀斗芒
城中哀號城欲圯
城外鬼啼晝不止
驚鴻寂歷背羣飛
榛莽蕭條野燐紫
匝匝重圍夜有烽
丈人妙畧施神工
從容芳餌投饒寇
九泥立使函關封
支離窮兔潛三窟
東南一枝聊寄跡
請看玉帳授龍韜
喜見嚴城完趙壁
須臾談笑猾虜平
復見當年謝安石

秋夜篇

迷迷澹空白粉掃幽輝下竹竹華稿素玉凝瀾
水國冷涼雲罩雨芙蓉老蟄螢飛飛花草草碧
窓翠簾寒生早細綠偎苔怯晚風鮮紅當路恒
啼笑露柳含光宿暮蟬蘭缸半吐燈英小何處
林臯叫夜鴻霧濕琴絲冰韻悄錦衣公子醉瓊
簫曼睩蛾眉歌窈窕寧知遠戍從征人望斷金
閨守孤照玉門關外路迢迢碎葉城頭凍行躑
寒到邊陲塞草黃戎衣未絮秋風嫋海氣氤氳
結玳橋江上石根坐沙草秋聲一夕霜林中籠
雞咿喔東方曉

天上謠

洞天去人九萬里涼風吹雲天似水珠扉高啓
赤霓翔水簾漾中素練舉碧花瑤草簇闌干張
君危坐聽啼鸞翠蜃吹涎作樓閣青田小龍耕
曉烟璇宮桂花秋露滑吳剛玉斧香凝屑絳節

高飄阿母來藕黃衫子翠羅鞋晏香鳴箏婉華
舞笙歌沸空擁吹臺自向東王一卮壽啾啾白
麟天半走貝闕人歸龍夜吼

春閨引

暖晴古陌花烟重紗帷日永商絃弄瑤窓寶箏
颼颼涼一線風吹金縷縫美人晝返遼西夢橫
鞦韆長雲粉腮凍曲池七十二鴛鴦疊股飛來立
水塘屏前日虹生粉光麗色妖娼倚象床脩粧

寫得蕭娘樣巧盼頻移宋玉墻轆轤滑綆雙絲
簇鴈沙獨步肌生粟春色挑將眼色嬌纖腰暗
減裙腰束婷婷自怯春衫綠宛轉蛾眉歌一曲
一聲一曲心自傷蘼蕪草香蝴蝶黃

石城美人春游曲

南雲北雲轉重蓋千峯矼立千螺黛野徑香穿
散小蒨輕烟入縷翠如葱長天一水晴霞籠官
街五馬遙相逢頻嘶玉勒步芳叢朱旗畫鼓春

烘烘樓頭橫竹吟古龍美人跌蕩飛鬟鬆塗眉
掃粉抹脂紅金絲裙子緋色醲方領濶袖篋漆
駝牛角稍頭血點同寶髻尺五貫天中鞋尖高
簇蓮花峯鶯嬌燕細語融融佯嗔假愠將惱公
參差掩袂步從容暗塵隨轂香濛濛月色凭灣
醉懶儂歸家斜倒銀屏東逗花風晚入簾櫳盈
輝翠燭光搖紅一春常恨鳳樓空

駿馬行送仲容弟北上

着風嬌沫噴桃花龍脊連錢玉甲斜錦韉踰躑
紫陌下金鞭蹀躞上林誇金鞭錦韉交輝映汗
血騰騫朱鬣勁隴坂長鳴伯樂驚星馳電發奔
雷競寶玦誰家俠少年腰帶橫麟白玉鮮聞道
燕昭憐駿骨黃金臺上拂雲牽衝鋒奮足闕山
嶺香撲新羅盧雕鏗一躍長驅叩帝闈排空會
騁周王乘本是龍媒擅玉京由來天廐列房星
君王倘駕龍沙馭萬里風雲按轡生

四時歌行

春

春風駘蕩春氣涼
銀窓日焰融粉光
戶敞朱扉巢海燕
塘開碧水棲鴛鴦
璇閨嬌女顏灼灼
香雲笑整搔頭掠
門外鷓啼烏白枝
堤邊白馬黃金絡
露烟籠淡色依微
游絲嫋嫋伯勞飛
油碧車空蕩子帳
金梭冷杼下鳴機
殘紅舞絮香撲簌
萬點春山暖芸簇
百轉新鶯撓午眠
花游紅

毯挑畫縠

夏

晴雲片片飛紅玉
莎雞振羽炎歎逐
江南採菱日未低
高樓橫竹商聲續
樓前湖水滑油油
隣女浣紗歸渡頭
少年共賈宜城酒
海錯山珍琥珀甌
欄邊開遍石榴花
水溢晶簾生曉霞
白玉床陳西子醉
蓮花幕軟阿環斜
紋聯羽扇銀交關
閑亭虛敞起白鷗
槐陰竹塢碧珊珊
金魚石

澄浮遠灣

秋

露花風草簷前綠
嬌妾宵沉長夜獨
明河高轉雲渚寒
香澁井梧芳綆促
誰家樓閣宿西風
鳴蛩遠砌來暮鐘
良月弔殘琴裡鶴
星鷄叫徹羅幃空
遼西夢斷珊瑚枕
零落碧荷亂朝寘
翡翠衾餘闕葉凋
漁陽信杳重啼錦
棄捐詞賦咏齊紈
颯颯西風漢主篇
洞庭沙上飛來鴈
廣寒清

徹霓裳絃

冬

瓊砧夜聽西風影
銅籌報更歸畫省
月落鴛鴦淨瓦霜
輕揚瑤霰胭脂嶺
凝寒輕透椒蘭殿
步帳層層九微焰
塞外將軍暗黑貂
筵前舞袖歌塵亂
宮主簾前夜色淒
玉皇春殿辟寒犀
鳳凰琴冷花如雪
明月枝殘烏倦栖
胡風千里催花剪
金閨費盡春蠶繭
悵望遙遙碎葉城
別來幾

度看苔蘚傳聞宣使發天津言道干戈瀚海濱
願得歌鐘寫竒績莫教戎馬背嬌春

弔節婦茅母居夫人

名家竒節聲奕奕芝秀蘭香擅南國璇閨嬌女
惜娉婷十五怯嫁東家側能文不減阿兄風烈
志能武賢姑跡阿爺擇壻洗馬倫于飛嫵婉三
經春生女能啼兒在娘郎君一枕卧秋雲舉兒
五日父不存撫棺不見同衾人中庭忍對合歡

樹碧空愁見三星陳愁腸九折如車輪袖中常
握白練巾捐生欲伴西陵魂中堂老姑週顧勤
襁褓有兒傷伶仃忽焉君子入夢驚殷勤燕語
如生平相期再結幽冥情從容殉君心并營手
提兒女授阿兄今日有舅兒有生更携卮酒澆
荒塋懔幃松栢何淒清歸來浩嘆對短檠淋漓
雙袖淚光熒白日昭昭去就冥夜臺有路從君
靈寒飛四壁秋塵橫柔姿脉脉顏如生空餘白

塚埋香纓誰者不死千秋名

新蓋公廨小齋園池成湯賦

排空一片犀渠白青泥澁梗雙魚立霜花草上
點如錢龍竿貫虛離離黑芙蓉凝玳結秋色玄
漿嗽玉翻紅碧小岸迴廊望野湟瑤輝吐輪石
城赤憂黃盤翠烟蘿織菱絲箬葉卧幽壁露席
飛觴泛口香空紗蠟馮胭脂濕方亭鑿木四角
懸望中倒掛清秋天睥睨凌高俯書幌桐陰半
老踈風頽苔徑峭涼纖霧滑寒香凍落佳賓筵
粉署蕭蕭有餘暇竹根沈火藜藜燃

夏曉

濃綠重陰籠曉洞火雲十里燒天絳寶粟香露
粉汗光玉簟秋肌午屏夢榴花血色朱囊控井
底輓轡雙梗重絲拽金魚上草頭東方赤帝炎
威送

送入歸吳中

長亭絮柳亂飛絲氣暖汀莎紫燕低帶水浪痕
飄窄綺石城霞擁紺綃垂丹霞窄綺互相映碧
草纖蘿媚芳徑朱櫓牙檣劃野蒨蘭舫綵纜緯
嬌荇此時麥秀棗花紛晚木籠鬆新壠平滿路
生烟融翠幕遠枝鶯語襍吹笙隆隆花鼓雲旌
下兩岸青山斲如界帶得并州金剪來半幅吳
綾好裁畫阿母行行紅日斜林香十里玉桃花
故園風物堪陶暑舊國清華爽氣奢王孫歸路

藤蕪葺風彩翩翩壯行色江樓流水滑潺湲樓
外月圓銀鏡立到家已及端陽律艾虎錦符光
瑟瑟板輿花塢菖蒲觴笑看孫兒爭遠膝

初夏曲送孀母歸吳中

麥花風軟涼雲弄簾虛輕縠瓊鈎控暖氣香浮
碧樹枝炎曛爛熳纖蘿洞露草池塘鴨綠光玻
璃水淨游鴛鴦六街蝶粉飄瑤幕遠院流鶯轉
玳梁流鶯粉蝶交輝映粧臺忽起思歸興快整

星輪一介輕徐驅玉勒梨花甃行行郊畔春蕪
老華日融融圓鏡皎碧剪荷錢零亂嬌絲曳丹
鱗出芳沼長途此去凝霞隔回首秣陵冰霧織
媿我羈留天外身還驚雙鬢蘆花色無計殷勤
唱渭城空餘青眼送行人秦淮一片波烟玉日
繫離情錦浪生五月綵符融翠髮艾虎蒲觴角
黍白曉雲茜絢龍舟翔欸乃歌聲浦口滑湘神
紫柱迎風擊洛嬪指案紅牙笛曲江妖冶自來

妍燕子樓高榆歷歷樓外漁郎敲石火沙頭牧
兒戴短笠野色蒼茫拂黛橫叢林烏鵲南飛急

宮中樂

春宮美人香氣撲瑤釵斜掩玲瓏玉團花曉帳
清晝閑三千麗質黃金屋送遠歌聲出建章婕
妤含嬌漢帝傍白苧新裁寶輪扇畫作雙鸞常
並面昆明沐浴洗兒錢七姨八姨相向妍纖肢
嫋嫋為君舞驚迴墮落腰邊素低眉微笑整雲

鬢纏頭色錦文鴛聯

聽美人鳴琴歌

新裁蜀桐青鳳尾彈聲泠泠小兒語翠水丹岑
指下生征鼙噪鼓絃中起美人携手促冰絲瑟
瑟香分輕縷衣露濕桂團龍腦凍碧窻月冷珊
瑚枝珊瑚枝上暈金徽淒淒切切秋鷺離長途
遊子淚痕結空舸灘口望潮回紅樓敲斷釵頭
玉文砧搗盡鴈書遲臨卣酒壚細草垂王孫府

中烏夜啼廣陵一曲少人知今日又聞雙環悽
一彈再彈三復移隔簾暗引清風吹吳天楚雲
昏欲暮玉堂烟浸鴛鴦扉聽之令人甦病骨晶
簷高掛銀蟾魄曲罷遙空羽客來使我凌飈冲
兩翮

效古襟曲

交飛海燕語雕梁夜夜春風白玉堂麗入綺欄
融藹氣芳生新院夢柔鄉曲房宛轉憐嬌淑曉

色池塘鴛鴦睡足秦女樓中烟露濃荆王霧裡行
雲渥朱戶瑤階十二重錦鞍寶騎挾妖童喜擲
銀丸追走兔懶臨碧沼羨游龍趙家姊妹昭陽
殿翡翠為鬟花比面金縷衣籠香麝臍茱萸帶
綰同心串肯酒橫陳明月光氤氳天半列笙簧
偏憎度鶴催宵箭惱殺晨雞促曙忙別設蘭房
連匝錦鳳皇臺榭珊瑚枕弄色朝窺玳瑁窓啼
妝慣繞思香寢但願追懽永百年莫作姮娥凌

紫烟若使能傳黃白秘更教入海覓神仙昔日
陳王漾淇汜綢繆未盡芳晨駛曾見門前桃李
顏紅葩綠卉能相擬年年照日媚春風勿悞傍
人戲馬逢常使相看兩堅固豈同溝水怨西東

贈沈姬瓊樹

玉樹枝芳菲節彩日朝輝好攀折青葱遙映隴
頭雲蓓蓓全欺葱嶺雪游絲嫋嫋眉柔條珠露
泠泠透香襯好鳥和鳴嬌上春芳池浸水浮花

月玲瓏玉質光風麗婀娜盈窓曉霞晰長持光
澤媚佳辰寧比片時桃李歇得意春陽薦曲房
肯效情偏斜領子八詠樓中才子奇瓊花觀裡
仙人列願同壁砌合歡枝氤氳香出鴛鴦熟

題扇上秋江送別圖為周姑母老夫人

離舟別恨生秋色水碧芙蓉嬌澤國淒其芳院
白雲房露落江聲絲草織不勝離思解扁舟密
意懷春暗結愁別渚孤蓬遮柳岸暮江烟澹枕
空流片時相送傍秋江遠度青山路渺茫無限
新愁憐去掉一天風細冷霓裳長年並棹秋風
立別有秋光飛短笠迅速纜離花下禪偷閑悄
把深盟執瑤琴不整舊朱絃重來江上聽蕭瑟
可憐松舍巧佳姻圖出蘭閨銀不律

越中偶成

越水清溪沙白越人去後花無色春宮樹老啼
杜鵑義士門前秋草沒飲血游魂悲古照傷心

國殤泣夢語姑蘇沉酒吳地兒越水空飄西家
女浣紗溪上月生波霸業全消設雀羅宮雲不
染新袍色墀草還驚秋蒂枯十年石室復還家
養士寧如一縷紗舞罷吳宮花月冷歌殘越苑
起黃沙吳嬌越艷稱南國粉澤胭脂多麗色芳
舟採月闔青蛾至今畫出長眉碧

山神吟

過鼉鼓撥雞箏愉吉日穆良辰籍桂酒盃玉瑱
神揚旂遭洞庭風嫋嫋微波橫被荔薜仍杜蘅
射天狼跨紫鱗發長矢驅犀輪乘赤鳳啾啾鳴
與女游衝迴輪凍雨冷雲滿林折疏麻拔瑤莖
目渺予贈所親涼風輕微露清塘水寥寥山花
生秋林桂子香濯英蘭膏九枝燁且明團迴蟄
彩鴛鴦屏龍韶蛟管雜錯陳舞裙刺袖度歌塵
橫安七指填空星口吟舌弄學新聲呼風嘯雨
滄盤羨山鬼睜睛攝生魂斂脈血拇裂人心披

青月曉神母臨靈兮端坐儼森森孔雀翠羽畫
屏深雙雙小環揭鸞旌路烟香燼步虛行東王
帝太一真諸天列宿五丁神九疑山頭悲帝子
巫陽臺上媚襄君翩翩白鶴來海濱領斜八卦
驅紫雲手搖白羽駕綵繩玉塵土花印馬根來
看漢武桃花春

寄贈孟夫人

美人相望春江曲門掩春風芳草馥江上梅花

玉笛寒隴頭柳葉生輕綠梅嬌柳織自芬芳盈
盈脉脉遥相望明月樓高甲乙帳青藜火暖庚
辛房籠鬆雙釧纏金縷襍錯五文製絲履粧鏡
朝窺碧黛螺瓊膏夜冷蘸脂水瓊膏黛碧媚春
容曲房細燃龍腦濃日壓重欄粘翡翠花生繡
幙醉游蜂含嬌掩袂花深立逸態芳神蘭蕙質
更憐新句問巴人一曲黃芩慚調澁我有楚蘭
芳澤國歲蕤半吐黃金色願充襍珮托隣鴻紈

扇裁成初月白

書文夫人扇頭

寒山石壁青霞倚朱草瑤花香襯綺叢桂山齋
隱八公桃開露井邀三侶桂叢桃塢暢幽哉笑
傲重林坐草萊巢雲不納王孫屐野鶴孤飛任
去來賸有隣姝來問字幾多賢婉怡芳思蘭珮
輕搖合浦珠鸞釵鬧掃飛鴉髻鸞釵蘭珮踏芳
春吳姬越女闔腰身金薄履纖香步步蜀羅扇

小掩頻頻五輪車轍清萍渡九華幕轉紅蕖路
低迴長袖勝春風妖嬈輕衫迴雪妬安黃粧鏡
寫春山玉笋柔籠金指環三五月明寧可負九
十春光或易還美人兩兩春山曲爭問東家索
珠玉裁成麗句奪嬌花賦就雲霞凌曉旭媿我
庸庸何足錄簾中明月光盈目嗜痴妄得夫人
憐劃來蚯蚓令予慙

壽陳石泓縣公太夫人

上元瓊錄註年華瑤島春濃阿母家一片芝田
香粉署三株寶樹麗仙衙函闕紫氣青牛吼南
極祥光朗朱牖華誥新膺五色書佳會高擎九
日酒斑衣相映紫衣妍八千齊祝稱大年河陽
縣裡花爭笑畫錦堂前春欲燃憶昔栢舟嗟獨
守今日義方推令母書紳膝下雛鷄兒玉立孫
枝蘭萼剖雕盤麟脯共瓊漿鸞管鳳璫襟琳琅
雲舒碧葉風烟翠霞影金波海日黃光風霞色

窺羅綺羅綺合沓光如水六珈聲振刺鴛裙七
香車穩雕螭轡湘江沅水縠波紋巫山郢岫鬱
蒼雲才彥自来珎楚國高風絕代賢湘君雅訓
熊丸志勵早蘭閨日夕萋霜草翠髮長隨素景
青芳神應共秋輪睥者頤鶴萸藐姑仙吳歛雅
奏麥秀天琴聲晝靜甘棠蔭定取黃麻詔特頒

悼親詞有序

予或獲責於上帝割去二親幽憂嬰疾形

枯神悴勉隨夫子就道旅邸荒蕭思親遙邁
悲來綿綿不能自遣聊抒四詞少記哀悼
我祖德殷殷瓊枝遶堦茁丈夫五六人惟父少
英哲束髮奮雄飛干霄芳武軼凜凜抱孤忠勤
劬王事肅我母贊中閨婉婉稱賢勗筐篚承蘋
蘩螽斯感摵木紀綱持戶樞辛苦共吞蘂一官
任浮沉濯纓謝朝列怡情樂丘苑養拙棲雲穴
耿介傲羲皇門屏車馬轍本意奉餘年風撼霜
柯折瑤草力難回瓊田仙路絕奄忽相繼捐恩
情從此訣呼天天聽高哭城城為裂嗚呼一歌
兮歌聲嗌哀哀周極情難畫

誰謂百年親終成死生別聞問更那從音容永
銷歇亡魂去悠悠重泉杳折折淚滴白楊枯恨
飲黃壚截苦衷荼自煎愁思芳草茁聚散嘆飛
蓬勞生悲螻蟻鳴蟬驚報秋游子衣裳裂心折
大刀環病骨支床憊酸風呼樹巔霜峽猿聲切

獨有伴淒其幽窓瑣涼月嗚呼二歌兮歌聲咽
攢雲為我生愁結

野霾爍晞陽寸草易銷滅循環追往素迴腸已
成纈悲我二亡親總幃風揭揭夢中相與語覺
後翻愁絕生承朝暮顏豈期中路訣一朝變寒
暑荆棘生仄徙皇皇姊弟孤犖犖門戶折憶昔
英女賢芳名紀貞碣予質本柔懦深慚葵智拙
不能保頭顱何以慰先哲叫號摩穹蒼哀痛心

脾徹嗚呼三歌兮歌聲啜人生罹此中腸裂
荷珠灸露光寒兔蝕秋月佳會難再邀良辰不
重晰宿昔侍庭幃自分情無缺出入形影依步
履追歡悅一朝捨之去誰來慰孤子蟋蟀弔荒
堦饑虫鳴土穴野竹敲冷風土花侵砌缺吟啼
四壁空婆泣幽閨絕對此刺肝腸峻嶒骨已屑
欲作薤露歌悲來不成節欲裁悼親詞思哽才
情竭嗚呼四歌兮歌聲切絲絲雙鬢飛流雪

贈歌妓安卿

春日寓居湖上承安卿過我以春歌相贈清
音逸響如微風咽簫四座生色援筆戲就聊
充纏頭緹錦以博一噱

紅顏麗娘髻雲掠十八鬟垂光焯焯恰移羅襪
度香墀自言曾入東家幕亭亭仙珮下雲中霞
衣五銖凌曉風釵燕斜飛粘翡翠裙鴛拖錦玉
玲瓏回眸倚笑千金顧子夜歌聲春草露若非

初嫁汝南王定是當年桃葉渡含嬌含態思悠
揚一曲一聲總斷腸變得新聲傳紫陌巧來樹
底引笙簧今夕何夕重嬉游共採蘭叢對碧流
總愛青山堪入座更憐裝盡覓歸舟烟蘿水月
蒼巖色隔院花深沉琥珀從此天涯一棹輕美
人望望若溪白

絡緯吟卷之四

東海徐媛小淑氏著

五言律

游山莊

促席坐山家蕭然林徑賒地栽金谷樹池溜碧
塘沙水月蕩心境雲烟澹物華若枝能繫日投
轄滯流霞

咏鷺

乍向芳叢寄還隨幽渚栖雲深不辨侶樹密錯
投溪度月光相暎侵烟徑欲迷偶逐長風舉疑
從遼海西

家園對雪

綠野彤雲合排空素練沈璧姿溶曉色瑞氣覆
蘭心過鴈驚天遠游魚潛浦深梁園傲清賞慷
慨激高吟

登一雲山

日色靜游塵霞光歛夕曛徑明諸嶂出山曉一
泉分粉堞悲笳弄雲樓花鼓聞幽然小宇宙清
嘯逐行雲

贈女鍊師

華髮已蒼蒼脩眉半掩霜談經風雨寂說法鬼
神藏度曲月明夜調琴流水鄉幽棲寄林鳥笑
傲是羲皇

飲山莊

霽色映明沙江流帶夕霞山光籠橘袖波影動
蕪葭葉底歌聲溜花前舞袖斜怡情坐來久
酒正交加

咏妓

雅調度新聲歌珠散舞袂妖姿宜巧笑冶媚謾
生春舉袖香分席凝眸態橫陳既知非洛浦何
事有斯神

贈滿妹

少小貯蘭房蛾蛾拂曉粧髻鬢輕約素眉黛巧
安黃寶鴨晨香滿雕簷夕月光梁園花正發誰
共理明璫

早春三首

別浦流雲亂風喧細管高日絲曛畫戟魚沫噴
蘭臯乳燕香泥掠雛鶯金縷飄紅樓驚思妾嬌
語弄檀槽

其二

宰錦護游輿銅駝歌雅調人影隔輕烟瓊扉融
晚照瑞筴正三辰祥雲開七曜暝色破花朝屠
蘇讓年少

其三

上暮曉春遲團團紅鏡窺蛛絲穿舞蝶花露點
游綦酒酌新醅醪盤供粉荔絲東風吹不盡香
發玉階芝

戲贈表妹合歡詩三首

桂室蘭燈燦雲窓歌吹新人如臨月戶色擬漢
宮春整艷窺鸞鏡修粧理翠巾含嬌愁出幙掩
映背腰身

其二

鵲動靈橋駕天孫渡碧雲霞冠籠翠羽寶鈿簇
鴛紋花點踈星靨螺痕淡月分盈盈香馥郁秋
水剪湘裙

其三

畫羅飄幌額毳帳鬱金床屏葉雕雲母樓心掛
月墻避風臺影翠蓮步襪生芳有壻恒為伴携
來花下觴

七夕三首

峭涼侵水殿河漢冷天榆粉席呈嬌技針樓射
縷絲長生金鈿沒百子彩牽離渠似雙星會經
年判不移

其二

纖露飄冰練紅亭片月孤精脩邀阿母瓜果下
黃姑射縷香絲嬋彈丸素粉糊九枝盈翠幙雙
耀動媒烏

其三

雕槃結蟾子巧會盼星珠緱嶺看鳧度衣樓望
曝初晏池游漢帝張樂鬧宮奴訂盟似河鼓佳
期歲不辜

牛女二首

奔流蘭浦合羽蓋逐星移倚月施膏靚憑雲拂
翠眉駕龍來斗渚填鵲向河湄促夜羅幃寂居
然對錦絲

其二

鵲梁斷銀漢別恨黯清流霧帶朝來減風鬟午
夜愁歛粧消舊粉整匣抱新綢脉脉憑機杼雙
心似去秋

詠梅二首

漢家追樂事割綵戲椒房結縷織粧就盤絲弱
蒂長遶枝生意巧半借指痕香不是河陽縣朝
來宴未央

其二

印雪添幽素斲霜翠葉凝窀於深夜月皎若玉
壺冰幹老風無力枝歌烟不勝巴陵驚候早競
發歲寒藤

中秋夜坐望月偶成

玻璃月浸蕪葭輕風折絳紗素琴啼怨鶴寒角韻
梅花簾細薄涼拂香微暮影斜坐看秋色裡幾
縷絢殘霞

送長倩三首 并序

長倩吏滿仄期赴闕上計輿夫促程半肩
未備短髮蒙茸斧資告竭秦淮烟水不能
驅洗鬱懷文酒雅會悉付勁風瘦馬與二
三奴子日作支離狀予更不能烹伏唯勸

渭城一卮以壯行色黯然銷骨情見乎辭
沙草碧雲天秋風使節懸星軺朱畫轂駿馬玉
連錢凍色露林白濕露霧葉燃帝城恩澤渥回
首莫停鞭

其二

郊曠澁胡烟寒凝紫塞顏笛聲流壠道鳥語出
重山客子單衣倦王程信宿間行行近紅日勿
訝遠鄉關

其三

一介東裝輕征雲擁使駟嶺松雕翠羽籬菊剪
金翎去馬鳴秋色行鞭亂草汀相看愁不定非
為別離停

游梅花塢步長倩韻三首

曙色曉重闈春山望裡新素林飛玉亂嬌鳥弄
歌頻騎壓平陽塢花同庾嶺春莫教吹落盡留
待詠花人

其二

一望碧城闈梅花伴主人鳳笙吹曲落花鼓薦
卮頻雪竇峯中影羅浮月下春郢中不乏調屬
和曲彌新

其三

花日玳筵招春郊列騎邀輕烟橫黛拂幽翠軟
雲飄點靨窺粧鏡分風弄舞腰不嫌泥滑滑屐
拆豈辭遙

酬趙夫人前韻三首

嶺猿啼日暮客思大江秋
夢破鄉關月魂消客路愁
玄霜飛翠髮花塢記春遊
長干風雨夜淚共楚雲流

其二

美人千里隔目斷一雙魚
去國悲裘敝刀環盼月舒
春輝曩野甸秋色老荒除
愧我枯腸竭勞君芍藥書

其三

花落三春別重來柳色依野薇
循麓散香雨逗烟飛傍石叅
仙子乘槎叩羽衣也知雙鬢影
應與昔時非

詠美人雨中觀荷二首

風破荷陰亂清流照淺妝
暗香籠彩袖踈雨拂紅裳
葉共羅裙碧花分膩頰
芳盈盈重回首莫悞逗秋光

其二

雨向高唐下人如雲岫來
珮聲流碧水珠露濕
蒼苔艷發朝霞色芳從歌扇回
更憐明月夜玉
瑄莫相催

亞歲

素司迎冥序葭律暖灰吹柔荔
殿風彩芳芸藹
氣滋今日書雲物佳辰進履
蒸夜來分漏箭門
外玉霜遲

五日二首

麥秋涼未去蒲葵扇已憑
艾裁懸戶虎絲繫辟
兵繒膏沐蘭湯潤牙櫛
畫鷁騰江心有神鏡甘
雨應祈膺

其二

採藥時當午烹臯饌百臣霞
蒸榴似火雲泛葛
如銀瑞莢應祥曆靈符着吉辰
金盤溫角粽囊
錦媚佳人

送孟年伯母還楚二首

紺旗懸綺陌玉節動陽關
沙色蒸雲黑蠻烟擁
幟班以茲勤夢想何地重攀援
萬里風塵道空餘碧草顏

其二

不淺通家誼龍門未許攀
柔情結遠樹幽恨遶
千山雙淚風前斷繁花雨後斑
莫將流水軫揮向別離間

寄懷趙四夫人二首

濕雨隴烟暗淒其故國心
烏歸千嶂寂花散一
簾陰門靜時聞柝亭閑不厭砧
美人秋色裡望斷五湖深

其二

羽書流古驛日日動邊聲
細柳雲旌黑龍沙鐵
馬橫雁回衡巖頂音斷石頭城
忽報明珠墮馳來萬里情

寄懷四弟

霜落碧天高，淒風樹杪號。
北庭華露草，南渚鬱烟蒿。
夢杳魂堪斷，愁多髮易凋。
望來音問絕，獨自旅情勞。

宿草

蟋蟀鳴枯蒂，芳枝委落風。
寒塗傷倦客，斷岸泣孤踪。
蕭索秋霜下，淒迷槁葉叢。
更憐飛雨後，憔悴任西東。

浮萍

逐浪依芳渚，憑風泛野濱。
浮踪應類我，飄薄倍憐君。
不染滄泥色，難同敗葉群。
順波流輒處，相傍一溪雲。

歸雲

一片銀生彩，歸心萬里遙。
歲蕤乘輦日，黯淡步虛朝。
吹落吳江曉，氛氳楚岫嬌。
卷舒隨意拂，孤影遠塵囂。

秋夕即景二首

池水淨於碧林深鳥語傳長空飄露氣衰草冱
寒烟急管調清夜悲笳咽暮天何當泛仙棹直
到女牛邊

其二

秋色映明沙澄江澹暮霞山空疑積翠池迥動
晴花風度荷香亂天高雁影斜蒼茫千里月清
影落誰家

屠舅夫人以扇索詩奉寄

美人隔南浦相去限重山奕奕瑤華粲盈盈若
可攀弄珠淇水上拾翠越溪灣勞我懷人意悠
悠明月閒

飲趙夫人山莊二首

為耽塵外癖選勝到禪林石磴流雲滑玄池定
水深清齋無俗慮芳樹有文禽媿我迷津筏多
君高尚心

其二

閒情游物表蕙思激孤雲採蕨甘山味冷霞遠
世氛鶴歸松露白花笑日絲曛說盡浮生事方
知覺路分

飛月

泫泫蟾光濕香飄桂子新遙空寧假翼碧海詎
迷津萬里窺銀鏡中天駕玉輪隨生亦隨滅耿
徹本來真

舞雪

葉葉碎寒雲瑤天亂玉鱗迴風疑舉袖集霰即
縈塵宛轉飛珠榭飄飄拂翠茵如今絳樹見想
殺魏官春

寫懷

生平慕玄素結想在煙霞鳴琴坐幽石閑情撫
落花飛鳥自來去白雲任紛拏內志既已適浮
沉安足嗟

禪燈

石壁秋光老
蘭缸靜夜融
星懸獅子座
月滿梵王宮
色相搖空影
闍浮入照中
應知萬古夜
一點破鴻濛



國家圖書館, NATIONAL CENTRAL LIBRARY, TAIWAN, R.O.C.

絡緯吟卷之五

東海徐媛小淑氏著

七言律

題山中古墓

葱蘢曙色望中來，一片寒光淨碧苔。
千嶂嵯峨雲影亂，一溪虛淼鏡花開。
白楊寂寂啼烏悄，芳草萋萋過鴈哀。
惟有北邙深夜月，幽光常照古陵臺。

飲山庄

冰輪隱隱影層阿池水溶溶映碧波百尺瓊樓
飄霧氣一庭寒色浸松蘿江臯露冷猿聲切古
岸風清落木多自是佳辰雲物盛不妨清夜酒
顏酡

石湖

石湖烟水望蒼茫兩岸青山接大荒百尺喬松
舞虬鳳萬竿脩竹弄笙簧烟雲縹渺迷歸棹江
樹依稀隱去航行樂不知天欲暮樹邊歸鳥已
成行

游徐氏山莊

秋空望望海雲連落日村墟見塔懸千疊芙蓉
侵碧漢一灣水月印心禪秋風半老梧桐色香
霧平分橘柚烟啼鳥夕陽行客倦不妨下榻卧
林泉

春日白下即事兼留別諸親

白門春望靄晴暉衣帶盈盈一水圍密葉烏藏
深院靜疎簾燕盻故梁歸風前惜別楊花捲道
遠懷人芳草腓縹渺帝居雲外隔天涯此日欲
何依

渡江

斜挂輕帆駕鷁舟澄江如練水安流氤氳山色
縱橫合縹渺烟光上下浮宿莽繁英堪罨蝶野
萍沙荻好葺鷗蕭蕭風起波心冷日暮清笳滿

戍樓

過龍潭驛口號

望中空翠白雲飄曲曲春巒跨小橋萬樹烟花
縈野嶠半天風影拂江湖山家酒熟葡萄泛渡
口魚鮮絲網挑日暮郵亭聊駐節盈盈纖月隱
林梢

感懷

日暮烟橫野渡幽平川孤鷺影悠悠江城二月

花飛霰客路千條柳曳舟別久杳迷鄉國夢行
來驚換旅人愁朝看風雨淒其色相傍羈情赴
水流

壽從嬭母

瑤池曉放碧桃花寶燭朝輝五彩霞羽蓋鸞音
阿母駕旌旛鶴馭蔡經家瓊宮練出丹如粟海
上携來棗似衣今日逋回千甲子式開玉曆數
年華

其二

業碧城頭紫殿重巨鰲頂上玉芙蓉祠開太乙
臨諸曜地迥秦源接五峰霧轂風迴姑射態雲
鬢月下海潮容將雛有鳳棲庭玉古桂香吹後
苑濃

九日望家報不至聞邊警

風雨重陽滿目愁鴈書終日恨沉浮夜郎絕塞
烽烟隔長樂深宮羽檄流故國黃花遙對酒邊

城素月倦登樓將軍自短勤王策悞把離腸怨
督郵

送長倩游西夷

萬里橋西月隱鈎露光黃葉暮林秋恐驚候鴈
聲淒切無那羈人客思愁未苦寒侵碧玉瓦也
應風透鷓鴣裘梁園正爾憐詞賦善病相如莫
倦游

重酬前韻

扇頭竒句拂霜毫錯雜雲霞噴海濤山上藁砧
天外杳江頭望石日邊高閒來止慣親囊藥嬾
去應知怯剪刀自是新愁同楚客不勝清怨續
離騷

其二

長風拂甸岱雲黃絕塞征鴻夜夜霜瀚海浮槎
人共影邊關躍馬笈為梁驚飛柳絮樓頭色落
盡梅花笛裡香聞道燕然猶未勒倩誰揮箭射

天狼

至曲陽樓偶成

徘徊却上仲宣樓，露淡寒空山翠浮。
月隱綺疏歌扇薄，風清毳幙鳥聲稠。
香凝春苑芳洲杜，綠映朱欄平楚疇。
高壁五城蠻霧裡，悠悠羗管望中流。

其二

水晶宮殿玉為梁，疊疊樓臺珠箔妝。
不是梯雲窺海嶠，還如附月到玄羗。
林開雲葉晴波皎，地織砂丹秀色蒼。
日暮碧雞飛度處，相依孔雀謾成行。

過貴陽道中

清風掃甸黛霞開，雨過花深溪水來。
霧滑野藤穿馬頸，香濃別苑覆龍材。
齊天雲樹迴山帶，截地豺狼卧草萊。
鳥影自孤泉自落，浮生偏自觸虛懷。

家園即事

彤楹麗日掛朱扉翠蓋金屏雲母幃溶溶水映
琉璃色灼灼花翻玳瑁衣鸚鵡杯中浮竹葉鳳
皇瑟上動金徽樂罷清宵醉良燕坐看魚鳥搃
忘機

壽大姆五十

春羅書字鳥親啣報道來從阿母前授與人間
丹鼎訣定教仙籍註遐年堦前瑤草侵衣綠架

上瓊花映幙妍更覩庭蘭一枝秀信知奕葉有
家傳

其二

武陵春色曉蒼蒼鰲岫雲深烟水長華表未歸
丁令鶴期門空佇水銀囊柏舟泛泛池塘暖蘭
葉翩翩楚佩芳旌里丹書垂竹帛女貞霜葉吐
奇光

其三

三山玉浪走霞光一徑天台路杳茫洞室有姝
憑檻望仙源無夢數更長停雲好伴烟霞侶駕
鶴高翔碧水鄉遙見長庚臨綺戶恍疑裾襲五
名香

金陵道中有感偶成

黑風剪樹暗雲光清霜滴滴玕珠涼斷岸冷烟
封宿莽斜塘古水簸蕭楊嬌兒未慣風霜色幼
婦愁驚道路長我亦迴腸縈九曲故園烏鵲夜

倉惶

效古塞下曲

攬槍西北壘昏霞橫笛榆闕月隱牙瘡氣曉開
迷首霜妖氛夜結暗龜沙年年萋色明妃墓歲
歲寒光蘇武家不見葡萄來紫塞空悲碎葉陷
征車

渡蕪江望月夜坐聞風舟中偶成

中流盪槩放行舸淡柳籠烟影翠螺籟寂水鷺

魚破浪江臯楓冷落潮多桂輪高吐碧空淨玉
樹扶踈黃鳥歌日暮層城橫笛亂天門風急剪
汀莎

其二

湯湯曲水夜鳴坡色映平沙汎芰荷神女抱珠
凌海岱江妃遺佩戲湘波遙岑歷歷殘星燦蕭
寺陰陰古木羅遙望白雲生野渡彩繩低處見
明河

看梅小苑懷曹娘

遶戶梅花三徑開羅浮夜色冷蒼苔懷人忽訝
窓橫影折贈還驚蝶浪猜玉笛隴飄殘雪墮金
徽絃促暗香來殷勤寄語蘭閨客莫負春光九
十杯

其二

盡日看花花滿林踈枝嬌吐玉森森香分庾嶺
情無限粧寫椒房媚更深瘦損墻東低綵幙輕

揚帳額眉芳衾歲寒已隔春光信翹首南鴻盼
好音

題垂柳

陌上光風拂素塵烟絲嫋嫋翠螺新烏藏深樹
驚悲婦蟬噪高枝隱去人婀娜靈和傾麗質纖
濃兔苑奏陽春一朝委葉同樗散搖落秋霜泗
水濱

其二

離亭陌上散芳塵鄴下齊看浥露新黛綠巧灣
粧婦色團香初著御袍人章臺繫馬爭攀折御
苑藏鶯幾換春今日飄零任蕭索淒迷風雨對
河濱

行清溪洞有感

山行竟日駕征車輕靄孤松落日斜高洞冷烟
迷古剎淡河流淺漾丹砂泉飛瀑布明珠亂樹
鬱琅玕碧玉華還問中峰應可到瓊樓十二即

仙家

早春

栢葉椒觴薦五辛
風調縱瑄轉青蘋
柳抽弱縷黃初著
梅寫清葩粉乍勻
岸拂鴨頭浮凍綠
門標彩帖賀宜春
路傍留醉游閑子
挾馬捎鞭走石塵

絡緯吟卷之六

東海徐媛小淑氏著

五言排律

酬贈曹夫人

浮雲起深樹結思逐歸鴻
月隱疑含態花明想玉容
贈蘭明契合遺珮表心同
迴文思渝巧紈扇曲彌工
白雪終難和蕪葭媿采葑
地分衣帶杳夢去枕屏空
采采芙蓉散蕭條對菊叢

園林同表妹坐雨

黑氣亘長空天南起白虹地昏山影亂江冷暮
潮通哀鴈避萍梗昏鴉栖暝峯恰恰涼颼至蕭
蕭烟靄濃園林退殘暑池沼落繁紅有客鳴琴
坐披襟倚碧桐秋來佳興好幽趣更誰同

贈弟婦葉娘

竒麗擅芳春風流自可人徘徊倚蘭幙來往映
花茵理鏡開嬌靨低鬟歛繡巾雙蛾施黛淺纖

手約黃勻琴調流水應管弄彩雲陳度曲湘江
上留珠洛水濱紋簾隱月色羅帳護香塵夢斷
綺窓曉花明乳燕馴相期大堤曲拾翠共良辰
贈潘娘

春草媚春暉晴光冑柳絲華堂張綺席佳客醉
醪醖宛轉洞音律風流開笑頰脩容驚洛媛秀
色逾明姬纖腰鬪婀娜桂履步逶迤巧傾吳后
繡絕倒班妃辭膏沐施玄髮鴉黃拂黛眉膩粉

分嬌面蘭香散口脂朝霞凝玉頰素月映光儀
密帶鴛紋疊輕衫皓腕施博爐香篆結瑤砌露
花垂流鶯啼睨腕乳燕度差池素女鳴朱瑟青
娥捧玉卮梁園恣歡宴日暮未云罷

家園即事

朱樓臨大道臺榭俯晴空千巖飛翠幃萬壑飲
長虹徑杳啼鶯滑花明旭日紅露凝幽草濕魚
躍錦紋通徘徊結虛思目斷雲間鴻

枯樹

搖落江潭樹披離烟靄濛銷亡傷裂桂蕪沒恨
摧桐北陸陽關掩雲門抱曲終花零非建始葉
散豈扶風擁腫才堪惜婆婆意已窮阿誰能作
賦庾信在樓中

贈美人

巧笑弄明璫含嬌出洞房裁金粘粉靨拂鏡寫
雅黃寶帳藏秋月金爐裊夕香鴛鴦籠翠帶蘭

麝染羅裳倭墮梁家髻梅花帝子粧輕盈妬羅
女窈窕屬王昌漫理將雛曲閑調陌上桑鳴琴
坐文石幽響發清商

前題

曙色影踈窓朝花競日芳鳥喧烏臼樹燕入鬱
金堂攬衣窺鵲鏡拂額理鴉黃寶鈿籠殘月瑤
釵映曉光薄涼侵蟬鬢輕霧拂霞裳襪冷織纈
怯衫輕皓腕涼披香出綺閣鳴玉步蘭塘遠山

未橫黛夫婿侍中郎

獻歲一日有懷趙夫人却寄

蠟炬餞殘夜青旛寅曉曦寒隨銀漏盡氣逐管
灰吹萬戶圖神鷲千家印鬼泥驚邪飛爆竹歡
燕賽靈姨池圻搖空玉梅飄冑素帷雲莎網危
石毳幙軟天絲濃醉屠蘇釀多燠栢葉脂登樓
驚柳色遠望隔山陂汝結青山侶霞衣被陸離
吾羈石城曲蘭佩悵心期百歲終成客三秋復

遠離歲華何所待夢裡換青眉

賦得衰草詩用侵字韻

脉斷清霜下悠悠悵子衿疎風等蕭索凍雨摠
難任別殿螢飛冷離宮燐影侵舞茵虛佩帶瑤
席黯華簪荻老容非故香枯色謝今支離悲道
遠寂寞委堦深獨遶高樓夢偏傷楚客心鉛華
能久待芳徑杳難尋

又賦得芳草步深字

春光平野合空翠步郊尋色斷王孫路芳牽少
婦心蘋風舞節亂塚月泣更深憔悴看經昔縈
滋復媚今歲蕤盈玉砌葱蒨耀華簪日暖遊蜂
冑烟濃塞馬侵常愁驚歲換哀謝豈堪任極望
傷千里空教憶子衿

寓邊城兵靖作

片月寒沙甸交河水氣聯金麾飄彩羽紫電拂
蒼烟野燒青燐照闕榆黯筴錢嫖姚初出塞都

護乍臨邊束帛通行使長纓繫左賢盧龍擯絕
域烽火息甘泉窟破闕氏老兵消虜幕穿金鉦
鳴玉帳畫戟耀長天鋤地栽蒲柳開塘賦麥田
將軍閑虎竹壯士戢鷗絃功成誰第一龍額最
推先

春日家園即事

淑氣發梁苑鳴湍下遠川天空見飛鳥山曉散
輕煙卮酒花前殢歌聲葉底傳俯仰宇宙狹卷
舒三徑偏及時且行樂莫使春光旋

絡緯吟卷之七

五言絕句

秋夜二首

秋色來空濛
澄江靜夜通
入林披爽氣
當戶攬清風

其二

掃石坐芳叢
臨池夜色溶
月高山影亂
天迥暮

東海徐媛小淑氏著

國家圖書館 NATIONAL CENTRAL LIBRARY, TAIWAN, R.O.C.

烟空

觀化二首

秋蟬隕枯桑
織雲翳陽景
物情隨變遷
幽心自悲哽

其二

落葉逐流風
秋髮易成絲
霜威凋細草
安得常若茲

曉步三首

早月璜初退
殘霞落古丘
靨星臨曉樹
江影帶烟流

其二

徐步曲欄斜
微風浥露華
亭荷嬌拂翠
新燕度明沙

其三

一片滄浪白
晨光上紫闌
曉鳥啼不散
着意在輕寒

游女二首

白日照形楹清風臨紫陌飛花拂面來相將擬
顏色

其二

美人倚玉樹春色生眉睫含笑整花鈿低頭弄
明玦

春日家園即事

名花遶砌生野竹叅差碧微風捲幙開幽香散

綺陌

眺支硎山二首

踈雨自南歸輕風起天末坐見浮雲舒臺空懸
飛月

其二

瓊樓臨曲道孤嶺鬱嵯峨日暮飛鳥去鐘聲度
薜蘿

贈麗人四首

卿卿絕世姿素質明於雪粧罷捲疎簾高枝轉
鷓鴣

其二

弱體不勝秋無聊支永晝何處最關情竹影搖
清溜

其三

欲折芙蓉花頻移曲欄右行行怯曉滑去去還
拖逗

其四

眉黛妬芳春眼波橫秋月婀娜步花叢風來輕
袂揭

擬陳思王七步詩

苦菜生寒泥根冷枝易落造化不異施風霜偏
壓弱

寄團扇與表妹

團團白紈扇皎同素月艷搖曳掠春烟掩映如

花面

早春對雪憶弟七首

夜永寒生簾晨窓見玉葩
關山千里雪飛思到
烟霞

其二

驛畔無梅信天邊有鴈斜
因聲相寄遠不敢問
年華

其三

兩雪征車阻春明未到家
人生俱是客偶爾寄
天涯

其四

倚伏本常態回眸盡可嗟
乍驚新節至忍話舊
繁華

其五

自嘆孤形鶴依雲入帝丘
巖松如有待勿使滯
滄洲

其六

春色染春條
愁黛當春結
悲我越林人
淚灑如迴雪

其七

溪涸魚難躍
花斑蝶已秋
君看日映雪
飄蕩似春流

題山水圖

玄雲走石氣
碧霧捲叢翠
紫竹板橋橫
泉聲白

壠沸

紅蓮二首

好共文君比
臉酥全未融
曉霞吹不散
灼灼澹烟籠

其二

琥珀盃中影
銀塘露下嬌
一枝輕過雨
珠淚透紅銷

客舍獨坐四首

桃李枝上嬌春來好顏色忽禁夜半風今夕非
去夕

其二

懶散日成癖支離只卧床藥欄栽百種不復檢
書囊

其三

欲識眼前果須知宿有因若明我即我從他身
外身

其四

楚地固多士中知晉乏材賢哉吳季子聞樂辨
興衰

雨中花二首

潤雨頻含笑迎人乍倚風漫看枝上色點點綠
叢中

其二

紅雨破春條枝枝軟碧苗不堪重問酒腸斷護

花朝

題大金吾劉夫人扇

庾嶺梅花老衡陽鴈不經憑將江浦珮遙結楚
蘭心

夢中聞亡親栽蓮感大士作五首

夢覺緣知夢身存復見身蓮花生淨土度我百
年親

其二

生親以故親忽接夢來神世界非世界端坐是
何人

其三

至理不分二水在月中盆魄伏水自靜水定魄
還反

其四

真觀非自觀禪定復觀禪但作禪觀義空觀是
法觀

其五

苦海成航海靈空本係空
偶因空外想空外竟
無窮



絡緯吟卷之八

東海徐媛小淑氏著

七言絕句

行茗溪即事二首

湖心一望淼蒼蒼古岸風清掃綠楊
野渚新鳧依渡沒溶溶春水半侵塘

其二

夜波微動水痕香漁火初燃網夕張
何處歌聲

弄明月霏霏玉露滿河梁

寄懷丁氏妹

故人相望限江干落木蕭蕭暮雨寒
絲髮暗傷愁裡換支離羞向鏡中看

春游

綠澹紅稠日正妍桃花渡口沒魚船
一群嬌鳥啣春色萬戶氤氳起夕烟

贈姑母

玉繩金漢影橫斜何處悲歌咽暮笳
惆悵孤鸞影分散簫聲空遠碧桃花

舟泊虎丘二首

虎溪烟柳夕陽收碧樹銀塘隱畫樓
一片香雲穿玉寺半林明月影湖頭

其二

玲瓏寶塔望中浮翠殿嵯峨接古丘
玉笛暗傳楊柳曲金英搖落荻花洲

虎丘懷古二首

石梁飛澗水滄茫
伏虎巖前草色黃
苔印尚留殘鳥蹟
空餘踈柳泣斜陽

其二

館娃宮裡舞霓裳
姑蔑旌旂蔽日光
西子漫嘯溪畔月
秋風一夜捲吳霜

春日

片雲捲盡曉風清
處處春光花滿城
流水暗浮芳草色
綠楊低拂舞衣輕

代閨娘閨思四首

習習東風拂翠幃
隴隴花氣惹輕裾
玉堦愁絕音書斷
故托春心問柳枝

其二

翡翠花鈿碧玉冠
薄羅衫子護春寒
閑來紫陌紅樓望
數盡飛花人未還

其三

雙星黯黯限河梁
風靜簾虛月一床
夢去枕屏空掩翠
愁來無那漏聲長

其四

涓涓玉露墮枝頭
坐見螢飛遶畫樓
最是傷心今夜月
清光一片繫人愁

寄表妹周娘二首

願聽瑤琴洗素心
碧窓幽思繞行雲
鶯聲歷歷驚殘夢
日暖江干草色薰

其二

落日孤城瞰太湖
蒼茫雲樹隱啼烏
憑欄不盡懷人思
愁聽千山響蟋蟀

戲贈歌妓三麗五首

卿卿美麗占南國
月擬精神花擬色
歌喉宛轉過行雲
曲裡珠璣應絃得

其二

雙環小姬顏白晳
雲帶籠鬆黛螺碧
朝來度得

陌上桑殷勤試奏來華席

其三

古來燕趙多佳人詎比娉婷貌出塵白玉作腮
花作靨珊瑚瑟上度陽春

其四

楚楚妖娥肌勝玉蓮花步步香飄縠纖腰無柰
曉風吹高葉瑤臺貯金屋

其五

平陽歌舞推絕倫爭似芳卿妙出群一曲清商
恰歡宴纏頭親贈錦迴文

秋夜三首

皎月如練秋氣浮光同千里長河流紅樓少婦
思欲絕塞下征兒雙鬢秋

其二

蕭蕭木葉墮雲扉銀漢低迴玉漏微霜浸寒光
侵寶瑟月明清夜理殘機

其三

槿花委露秋思清涼風浙瑟枝上鳴閑庭寂寂
芳草生遙指三星今夜橫

送邵妹北上二首

烟波漠漠大江平簫鼓駢闐別恨生把袂不知
春日暮故鄉回首白雲橫

其二

翠幃金羈拂落花揚鞭西指夕陽斜行雲望遠

歸鴻盡遙見青山起暮霞

泛茗溪四首

扁舟泛泛五湖白芳草芊芊亂行陌滿目蒼烟
飛暮霞一片晴山千仞碧

其二

洞庭風景烟如織茨藕花香鳴蟋蟀嘹啞孤鴻
天際來繚繞旌帆雲外沒

其三

落日平沙遠岸幽紛紛楓葉逐行舟靜看此去
東流水載蓋浮沉千古愁

其四

鸚湖相望浪滄滄月印波心水面涼何處悲歌
推激管不堪愁思黯河梁

五絕句送長倩夫子北征

依依堤柳半鴉黃送子行行過野塘岐路悠悠
悲別鶴不堪飛雨黯河梁

其二

離亭驛馬繫長楊荒煙鷓鴣鳴噪夕陽咫尺征塵
蔽星漢輕衣曳曳捲黃霜

其三

金樽玉碗醉壚頭月色湖光相映流落落孤帆
掛離思半林秋色擁征裘

其四

蕭蕭木葉動鳴秋寂寞寒泉帶急流西風一夜

披霜月飛向江南草木愁

其五

洞庭湖水任悠悠楓葉霏霏滿渡頭寂寞朱扉
掩斜柳金風不度薊門秋

詠宮人曉粧三首

仙掌雲移日滿窓六宮窺鏡寫鴉黃紅酥茜粉
融香頰密刺花根引蝶狂

其二

規月雲梳合翹粧七星珠珮九華璫御前給得
新龍腦滲入羅襦襯體香

其三

迎風紫殿柳烟黃燕薄簾鈎碎語忙玉水拂粧
穿曉井碧桐花笑瓦粘霜

宮詞四首

金殿差我列九堦內家嬌踏翠雲鞋玄鬟碧黛
爭扶輦知是司花玉女儕

其二

水灌香泥碧草萊
笑隨雛鳥啄新槐
盡日禁前無召喚
擲盧隊裡得梟來

其三

魚藻宮深樹影排
晝閑蕭散小窓娃
染毫榻得滕王蝶
自獻君王白玉階

其四

子弟梨園樂事多
業業小妓抱雲和
主家教得

新翻曲猶似開元供奉歌

近宮詞四首

禁宮遙迥赭墻高
萬歲華筵列九韶
嬌女如花齊捧玉
酒觴先進鄭櫻桃

其二

上林虎圈列重圍
帝子宸遊動鼓鞶
三百內監齊整束
紅旗影裡蔽花桂

其三

千巡蠟炬絳烟燒天樂遙臨碧漢飄深鎖內宮
聽漏徹比聞前殿罷清朝

其四

千官無事禁葳蕤玉案新來不納書報道單于
消獵火太平天子坐宸居

塞下曲五首

薊北霜花捲鐵衣將軍燧火度金微轅門殺氣
連郊黑馬上生擒黠虜歸

其二

角鷹初下草根腓捲髮胡兒馬正肥臂挾烏號
雙赤羽祁連山下射鵬歸

其三

前茅衝突任橫驅獨立中軍親鼓枹百萬吐蕃
渾倒甲長纓先繫五單于

其四

破衲沙黃野燒燹榆關昨夜掩天驕汾陽小队

前旌出翠旄金羈佩寶刀

其五

精兵萬道肅行儀號令新傳李貳師
匹馬踏平沙草窟烏孫城角有降旗

宮怨六首

月午庭梧秋露涼漏深簾箔倒飛霜
重門合下歲鞋鑰獨對終宵寶鴨香

其二

梅燼蘭消清夢長恍疑天閣舞霓裳
嬌歌未斷新鶯報起見晨光已透窓

其三

金屋秋塵織網橫夜寒高碧見河梁
雙星不向人間照暮冷梨花白玉床

其四

碧苑春深鄗寫黃盈盈嬌女曲闌傍
寶釵羞插雙鸞並合翅愁簪對鳳凰

其五

脉脉深宮桂殿涼
阿嬌金屋夜飛霜
千金欲買相如賦
白首文君怨已長

其六

六龍仙仗五雲翔
侍從繽紛列教坊
開着禁林絃管亮
班姬辭輦趙姬將

重弔孫夫人六首

杜宇啼聲斷客腸
永安回首路茫茫
錦城絲管

渾如夢惟見春風掃綠楊

其二

錦帳三千護主家
王孫鶴駕暮雲遮
幾番夢落樓心月
簾外香浮玉洞霞

其三

三國衣冠紙蝶飛
蛟宮花草自芳菲
當年激管繁絃地
惟見黃壚白骨圍

其四

將軍無策定雄圖
巾幗周郎豈丈夫
降城不假天山箭
粉黛翻為金僕姑

其五

列樹森森映蜃樓
珠簾暮捲海風秋
瀾迴碧漪千山合
坐擁刀環紫殿幽

其六

萬古傷心鎖碧湍
空餘衰草泣孤灘
相望蜀國深宮月
白帝城高起暮烟

採蓮曲十二首

濕蘿低映石榴裙
髻簇華鬢寫綠雲
徐步凌波拾海月
恰疑湘水涉湘君

其二

繡帶牽花蔓刺蕢
擢歌微動水萍分
携來小妹恒延佇
猶憶城南殢使君

其三

錦帆涇裡百花船
曾唱吳娃舊採蓮
共弄明璫

拮曉翠不知夜色已平灘

其四

妖冶三三隱綠揚紫騮飛控紫絲韁應知隔面
情如語暗送風開寶袜香

其五

十三學得楚兒粧羅襪凌波趁曉光水面白蓮
花萬片枝枝相映玉釵涼

其六

斷風吹入水雲鄉似近鮫人織素房日暮烏啼
深樹杳相隨漁火出橫塘

其七

雙飛青雀下湖西杏子單衫結束齊搖拽櫓聲
雲外出滿郊烟冷撲香泥

其八

十二峯頭秋露涼門前沙白水蒼蒼浣紗溪上
新萍色不似蓮花並妾粧

其九

新粧日射汗流香爭向花陰納晚涼低唱柳枝
斜拂水更流青盼媚蕭郎

其十

不畏沙頭荷芰風半江雲影一帆紅曾聞昨夜
隣姬渡墮翠遺鈿出鏡中

其十一

風弄荷錢歷亂搖吳姬越女闔纖腰迎人浦口

花如笑十里鶯啼送落潮

其十二

曲曲橫塘白似銀素波流月醉羅裯歸來笑把
花籌筭握裡瑤枝不讓人

竹枝詞四首

烟啼霧掃玉珊珊寂寞蒼梧雲影寒清淚未隨
香骨盡至今餘恨著琅玕

其二

空濤灘上日平西
征客長途倦馬蹄
恰恨蒼雲攪鄉思
一聲腸斷在猿啼

其三

由來啼鳥助人悲
無義灘頭剝別離
試問參差祠下竹
為誰掩映寄相思

其四

紅袖垂風紫陌東
門前斜插碧芙蓉
妾從江上投魚信
郎在瀟湘暮雨中

柳枝詞五首

春風門外草萋萋
折贈行人襯馬蹄
憶得征驂隨處發
一枝長碧鄴城西

其二

移入深宮傍苑生
殿前嫋娜憶張卿
君王自是憐年少
不向離亭縮別情

其三

粉絮香飄三月天
笛中春調度陽關
葉砧又限

流星驛片月空懸萬仞山

其四

官渡曾悲出塞吟武昌新種正陰陰莫教葉碎
長楊道明月樓中斷好音

其五

長條抽綠舞腰輕慣向章臺殢有情白馬青牛
遊不返紅粧玉筯怨歸程

題山水圖代外作三首

花塢長埤跨石橋畫船春水曲江橈月明靜夜
重陰碧樹杪啼鶯亂玉簫

其二

走馬馱金俠少年輕裘沽酒白雲天紅樓曲宴
仙人語幙底風吹香霧妍

其三

傲吏為郎粉署閑愛看雲物憶家山憑將幾點
丹青染日日樓臺紙上安

代姬人春怨

翠黛含顰不自持，滿腔幽怨惜芳菲。
幾回夢斷珊瑚枕，贏得纖腰似柳枝。

遊仙詩十絕

銀浦迴雲咽不流，水凝珠珮殿橫秋。
迎風不閉冰綃幕，指點雙鬟控玉鈎。

其二

六雲華蓋紫綃裳，鳳帔星冠白玉床。
自摘一枝

紅芍藥，笑移花下倩人粧。

其三

翠翡蘭苕結石洼，揄榆歷歷影婆娑。
袖中瑤草金光色，架上瓊花白玉柯。

其四

淶浦搖光漾蜀羅，松風萬里度雲窩。
仙人歸路乘玄鶴，帝女排空曳翠螺。

其五

九點孤烟雲外平
蒼梧碧月洞庭春
斑枝嫋嫋雨聲瑟
洛水人歸露滿巾

其六

已隨青鳥渡明河
復見仙姝弄玉梭
共醉銀駟拾海月
不知春色上林過

其七

寶照水球碧落生
晶盤甘露濕歸雲
諸花忽放天山霰
片片香分玉蝶裙

其八

風月名香午夜飄
白毫影裡見紅綃
上元載酒麻姑醉
侍女低橫碧玉簫

其九

繡錦拋梭日夜忙
支機片石冷河梁
鵲橋不為雙星駕
一水盈盈秋露涼

其十

鉗鉢金沙洗碧流
月明孤鶴夜悠悠
綠陰深處

東風急分得曇花紫鳳裘

題園中竹四首

落影搖光撒碧絲
濕香新翠點輕枝
雙飛粉靨琅玕重
繚繞青烟露井垂

其二

紫石蒼泥壘玉叢
長條籜落拔墻東
迎車稚子爭攀駕
挾尾稍稍綠草中

其三

小苑春明竹塢開
抽空千尺惹雲隈
還將一節秦樓奏
曲引東王鳳侶來

其四

素質清華傲雪摧
幽莖古幹小龍材
相依自伴孤臣潔
不傍湘江帝子栽

贈從弟仲容北征五首

往送征車雨雪紛
層層津樹隱江雲
今朝又作陽關別
明月春山鴈羽分

其二

輕風昨夜渡清萍一片晴光散紫茵更向高城
隨去轍為君飛染洛陽春

其三

胡雲片片薊門黃麗日融和遠建章看取朝來
絃管亮中天吹向紫霓裳

其四

半山空翠剪芙蓉萬里長天駕玉虹別酒重傾

新市柳離騷遙控五雲中

其五

千林月白夜溶溶上苑春紅散玉驄濃醉看花
宮漏曉歲鞋不鎖夜城空

楊玉環五首

嬌歌花萼舞霓裳橫惹胡塵入建章一自飄零
馬嵬血斷魂消盡荔枝香

其二

內家巧飾道家粧壽邸歸來拜上皇爭羨池塘
鷓鴣暖寧如被底鎖鴛鴦

其三

六宮誰似美人芳娘子齊稱擅玉房艷極却嫌
脂粉污遠山微掃倚三郎

其四

亭亭浴罷出蘭湯紅汗流珠玉粟涼晝靜綠窻
人不至偷將玉笛惱寧王

其五

午屏抱枕日初長宣召忙傳待舉觴睡足海棠
初着雨阿環承寵在昭陽

燈夕偶成四首

冰粼細擁水天斜萬樹星燈影絳紗何處歌鐘
迷凍角畫樓簫鼓小侯家

其二

風光三五正繁華踏遍春郊闋麗娃日暮板橋

明月下凌波露冷濕鸞釵

其三

千官無事放花遊紫禁春城不夜樓
盡醉葡萄千斛釀愛探花信為花留

其四

霓裳吹破碧天霞十二紅樓玉鏡斜
白下兒童爭拍唱珊瑚鈎掛紫蝦蟇

贈薛素素五首

連城聲價舊名姬養紙芙蓉香粉奇
綵筆揮雲誇濯錦誰言蜀女擅稱詩

其二

幽蘭九畹墨華淋走馬章臺彈撲金
却買輕車駕油壁西陵松下結同心

其三

雙鬢嬌襯步蓮生一束蠻腰舞掌輕
乍倚東風力不勝素華纖霧月中盈

其四

花神俠骨氣縱橫
學寫蠻粧向魏城
手把龍文談虎畧
胸羅十萬薛嵩兵

其五

重開別院貯文君
寶絡千金換翠裙
非雨非雲香滿路
前身應是薛靈芸

贈琵琶衛娘二首

十五粧成學內家
衫單杏子髻歌斜
娉婷獨抱

雲和語芍藥風前籠絳紗

其二

雙蛾宛轉玉搔斜
錯落峯頭片片霞
嬌態恐教春萼妬
忍將一種似梨花

題籬邊菊

微霜清淺濕蕪葭
一夜西風燦野葩
對酒踏歌花塢下
南山蒼色落儂家

蕪陰晚眺

高風落木破江流
吹亂江雲動客愁
明月關山聞夜笛
鴈行西下洞庭秋

金陵吊古二首

秦淮流水日滔滔
陌上青駝絡繹驕
寂歷故宮三十六
板橋猶自夜聞簫

其二

離宮烟樹草蕭蕭
漢寢吳陵暗土膏
夜靜隔林歌板徹
戍樓微度海輪高

將去金陵別東隣諸老母二首

明月蘆花印水蘋
朔風吹葉滿江濱
不堪共指東歸水
脉脉離情向爾陳

其二

數年為客悵羈棲
今日花前暫解頤
又向離驂頻恣別
相逢更締一年期

題瀟湘八景

青帘曳曳軟風翻
夾岸春流曲幾灣
解珮不須

絲絲吟
愁路遠醉看春日度空山

其二

碧岑香靄一泉分
密傍鄰舟暮雨聞
烟草淒其江色冷
夜深若個勞湘君

其三

香臺結翠倚山椒
萬樹青松入紫霄
野寺寂寥僧飯罷
鐘聲一點落寒潮

其四

滄浪碧月洞庭波
一片晴光秋水多
寂寞孤山木葉下
寒潭何處動漁歌

其五

帶水湯湯漾蜀羅
亭亭紅樹隱輕莎
雙帆望杳自天末
落日低徊影白波

其六

一羣鳴鴈墮寒沙
黃葉溪頭間荻花
憔悴美人明月夜
幾回清夢到天涯

其七

漁簑搖曳倚斜暉
日暮投竿冷釣磯
遙望天空山翠疊
鳴榔西度綠烟微

其八

江村夜雪老蕪葭
玉樹朝飛六出花
誰謂林深絕車馬
月明清興剡溪槎

咏繪圖八景

春山春草繡平沙
寒樹叅差傍酒家
隱隱翠眉

朱幙下
夸粧不亞野棠花

其二

雙倚蘭舟泊水濱
琅玕瑟瑟濕溪雲
若教夜半來飛雨
莫向關山客枕聞

其三

朱寺岩堯萬壑風
清溪石上揀孤松
一肩行李去心急
指道村前已度鐘

其四

一羣飛鴈下平湖
歷亂西風散野蕪
遠樹明沙秋色裡
音書寥落問征夫

其五

珊珊紅樹晚花開
兩點春帆江上來
盡日家山掩綃箔
蒼烟滿徑濕芳苔

其六

百尺冰濤一望通
亂山新翠簇芙蓉
更將明月當空立
浴淨銀丸萬景空

其七

脉脉垂綸坐釣磯
綠簑搖曳挂斜暉
一從客座驚宸夢
誰謂深村老布衣

其八

氣冷空山雪作花
夜深乘興泛溪沙
前村縹緲白雲合
放棹歸來月影斜

班婕妤好二首

嫋嫋西風下露枝
漏深寒影入簾遲
傷心舊事

悲紈扇不向空庭盼履綦

其二

半道恩消謝輦餘搗殘銀管夜窓虛高情不問
羊車路獨對寒燈自校書

明妃詞二首

風拂胡塵亂髻鬟忍將玄鬢雪中斑旌旗亂繞
陰山道報道單于罷獵還

其二

漢曲琵琶馬上禪含啼絨怨度桑乾獨憐瀚海
千秋月夜夜嬋娟青塚寒

金陵留別叔母三首

幾經花暖上皇州今日心旌不繫舟明月停驂
重回首空城潮冷白門秋

其二

白門烟樹隱征車露冷秋江夜色虛此去雲山
斷天末願從過鴈覓音書

其三

音書迢遞已知難別鶴悠悠幾日還信道百年
終作客傷心此際限重山

留別金陵官舍九首

主人家住石城灣翠柳絲絲池水間數載依君
托行李裝輕五兩逐刀環

其二

刀環飛鏡轉天邊遠客歸心忽黯然笑指秣陵

江上月何年舉酒共嬋娟

其三

嬋娟桂滿影珊珊月到中庭人自還南北萍踪
似飛燕一番岐路又重扳

其四

重扳岐路向層霄萬里滇南驛騎驕花爛長
人去後雪迴庾嶺夢空搖

其五

空搖魂夢憶匆匆此別應知自不同望斷綠楊
枝上月臨風回首灞陵東

其六

灞陵東去即陽關一曲驪歌玉樹殘竟日乘流
泛烟水盧家有女倚欄杆

其七

攔杆曲曲酒旗閑烟樹秦淮落照銜莫向王家
問桃葉歸心今日逐征帆

其八

征帆高掛曲江頭九月黃花滿帝州從此天涯
任為客衡陽驅雁數行秋

其九

數行秋鴈下衡陽應寄離人歸思長好向碧雞
關外發莫教風雨滯瀟湘

別孤弟六首

桐花忍為故園攀驛樹離披古道難明月孤帆

客心懶何年魂夢逐刀環

其二

飛蓬飄忽任悠悠江上青峯黃鶴樓此夕懷人
對瓊樹斷腸羌管在城頭

其三

行李秋風馬首東不堪搖落柳枝叢迢迢離恨
杳關塞緘怨無從寄遠鴻

其四

古月寒光照客衣夜深烏鵲帶霜飛且須暫寄
城頭樹莫傍羈人客館歸

其五

水國寒侵露氣涼殘雲攪雪凍飛霜孤蓬此際
傷枯草落月何年在屋梁

其六

臨岐獨向閣中啼幾遍停驂忍向西淚盡蠟消
清漏斷馬頭星曉聽林雞

繫舟毘陵道中月下憶兒婦四首

空江月色夜猿愁一帶高城暮笛秋人去北堂
飛夢斷漫將心事付離舟

其二

已傷腸斷聽陽關明月依人度遠山莫向天邊
怨圓缺且餘孤影照離顏

其三

溫性柔肢玉不如盈盈疑握掌中珠踈烟淡月

扁舟杳不見留仙七寶襦

其四

枯岸烏棲瓊樹枝關山碧月憶娥眉芙蓉花老
吳楓冷何日相看慰別離

別曹娘三首

木落西風萬壑幽忍將離思為君留碧雞關外
淒涼月偏向蠻雲夜夜秋

其二

江上青楓一葉輕，停撓不敢問前津。山深自是無楊柳，折得桐花寄遠人。

其三

六詔風烟隔鴈沙，行行數騎去天涯。不堪故國空馳憶，已見長途別歲華。

除夜宿客邸懷兒婦四首

日暮天涯夜色寒，郵亭零雨伴更闌。已知歲向愁中盡，不及春花院裡看。

其二

客思徘徊道路艱，懷人夢斷限層巒。輕風一夜消殘臘，陌上春和塞草顏。

其三

洞口梅花枝已斑，暮冬疲馬度重關。可憐輕別隨征鴈，不道行雲杳未還。

其四

萬戶春聲動地歡，展衣獨坐夜光寒。莫言歲換

催雙鬢前路崎嶇匹馬難

舟過麻城懷大金吾劉夫人三首

幾欲仙源一問津
苦將消息扣漁人也
知朱閣
凌青漢不是桃花路
避秦

其二

芳春杜若暗汀洲
歷遍青山覓故侯
怨殺孤城
遠千尺教人空憶昔
年遊

其三

江城風日絢朝霞
流水溪橋曲曲斜
望裡碧桃
千樹合美人樓閣
限層崖

蒲圻道中雨

春光九十雨綿綿
楚水江雲一望連
千疊蒼蘿
萬行徑更憐馬足
滑泥田

桃源咏古二首

曉烟籠翠一溪斜
耕穫無人蔓草遮
檻外白雲
軒下靄濕陰滿徑
碧蕪葭

洞草流香苔色斑仙人歸去珮珊珊武陵溪上
桃花路歲歲春風燕子還

滇中曉望

歷亂鴉飛玉鏡斜一天風露濕林花孤城杳渺
高樓寂極目雲山萬里家

寄懷

露井桐黃落鴈風空江木老冷芙蓉薄寒不共
秋宵盡輕透征衫第幾重

寄贈年家妹二首

瑞風輕散薄寒分畫省新鶯花下聞日護蝦鬚
閑繡線織霞嬌映石榴裙

其二

巫山巫峽杳沉沉湘水湘江千尺深我折芙蓉
蹇秋色知君已結楚蘭心

元夕四首

織竹千枝巧作龍烟花十丈樹玲瓏更將銀鏡

懸天上華屋朱甍素玉叢

其二

花葉雲衣畫幟融
剪羅疊玉壓神工
傳柑夜半人歸後
星閣遙看錦荔紅

其三

燈火三辰樂事濃
君王不禁夜行蹤
踏歌少婦嬌如玉
對對粧臨淡月容

其四

錦繡城都十二重
雲離海嶠碧天溶
水晶鈎下流蛾火
簾影風搖太乙鐘

明妃三首

淒笳悲咽角聲微
焦斗銀篝漏下稀
夢斷隴頭沙上月
芳魂何日漢庭歸

其二

塞外無春邊草枯
玉關音信向來孤
自將花貌平戎虜
不用中朝金僕姑

其三

猗蘭情歇故臺空
戚里恩私絕塞鴻
回首秦關背秋月
龍沙飛雪黯胡中

荅趙四夫人却寄七首

涉盡長途千萬山
愁聞飛鴈洞庭還
更飄龍笛秋風裡
思逐行雲度玉關

其二

漢月常懸照碧雞
葉榆水淨海風淒
不教枕畔

屏山隔自是鄉關歸路迷

其三

不染身如天地長
鉢羅花笑梵王傍
等閑禮罷蓮花座
猶自垂幃列講堂

其四

花氣炎洲錦作茵
哀牢城下景長春
黃昏烽火蠻烟黑
未若青山鶯語新

其五

博士才華迥出塵
大家聲價邁前人也
知明月樓中客
幾為耽詩減玉神

其六

書到衡陽鴈自還
故園花柳若為攀
愁腸盡日車輪轉
江北江南夢度關

其七

聞道維摩示病因
故人天外有佳音
願將甘露除煩垢
月在中天鶴在林

寄懷孟年伯母三首

素秋烟嫋暮霞微
落月松深隱夜扉
此夕天涯人去後
一簾霜色自空飛

其二

兩地相看隔曙雲
盈盈燕語望中間
可憐咫尺間關地
不似青山遠送君

其三

殷勤遠寄一行啼
楚水湘江烟路迷
欲訴離情

看折柳更傷鴈斷夜郎西

贈孟年妹花燭詞三首

雀屏輝彩玳筵賒鳳燭樓高蕭史家十里笙歌
籠錦幄炷檀繚繞墻窓斜

其二

曉幙朝開九華扇鵲橋初駕五雲車風飄霧縠
明璫燦臂縷斜封護絳紗

其三

寶鏡嬌窺艷粉光秦樓夜月暖銀床玉簫吹入
絲雲去蘭珮分來燕姑香

塞原秋晚三首

日日驚沙素草斑秋空霜鴈洞庭還幾多瀚海
灘頭骨淚盡紅閨鏡裡顏

其二

定遠歸來戎馬閒西風羗笛散榆關葡萄塞外
青青柳曾向征人傍馬鞍

其三

落盡椒花白露溥
秋郊成老塞垣寬
銅關勢亘
羗夷遠鐵索橋橫
弱水湍

七夕五首

競向靈姑薦果瓜
晶盤誰解鏤菱芽
深閨枉用
針尖卜技巧由來
出內家

其二

海月珊瑚樹影斜
芳池白露下蕪葭
機絲隔斷

須拋擲錦石應留使者槎

其三

龍媒鵲駕隔年期
猶勝人間怨別離
百子池邊
漢宮戲同心五綵
合歡絲

其四

盈盈玉水七襄帷
隱隱星光爛九枝
霧散滿庭
芳桂落雲踈天漢
絳河低

其五

絲綉
四
水果佳辰星斗垂黃姑織女喜追隨只愁天上
沉明鏡兩地新愁似昔時

七夕望家報不至有感

空城蕭瑟絳河迢夜淨寒空松影高憶殺蓴鱸
秋色遠朝來塞外進葡萄

聞邊城兵靜喜賦三首

象譯頻平信使供哀牢樹色影金墉樓船久息
昆池戰明月常清十九峯

其二

欃槍已沒碧天賒滇苑春紅萬樹花千斛葡萄
歸玉帳將軍龍石在龜沙

其三

兵戈消盡減征車不用長城建虎牙細柳營閒
征戍卧任教捲葉作吹笳

滇南別馬夫人三首

萬里相看萬里愁匆匆此日暫淹留夜深明月

空山落遠岸猿聲江上舟

其二

滇南塞北路漫漫青草隋堤曲幾灣
搖曳孤帆
盼津樹夜來風雨在空山

其三

石頭城下水悠悠芳草春湖字莫愁
記得昔時
花笑處今來烟霧鎖重樓

行清溪洞有感三首

溪山靈壑舊仙家雙樹青枝印寶花
功德定河
流八解法皈淨土聽三車

其二

六劫塵中度歲華三途苦海寄生涯
若從心境
窺塵境無碍心中見佛牙

其三

寂寞風簷草砌畦清溪曲曲泛溪沙
浮烟露月
山籠碧空谷仙留萼綠華

別馬小夫人二首

星軺早發望魏坡
回首高居影黛螺
天外美人屏外夢
銷魂偏是別離多

其二

霞分雲集度離歌
搖落參辰隔絳河
莫怨風帆歸去促
儂家自是戀尊鱸

行山中看雨後花四首

霧帳撩烟浸碧砂
微風滑雨驪雲芽
濕陰滿徑

青苔薄無數香抽百合花

其二

水滌砂磯走竹蛇
瀾生石足跳蝦蟆
朝來梅雨翻紅藥
飛亂金錢夜落花

其三

遠浦沙平蔓草遮
雨中深樹見人家
當壚少女臨粧罷
雙鬢斜飛金雀花

其四

林濃綠樹可藏鴉野曠螢飛水竹斜涼雨暗歸
雲嶂白露華輕拂杜鵑花

題飛雲洞二首

玉柱浮樓結片礫石雲朶朶翠光搖瓊膏細氈
苔凝碧簷外寒飛素練濤

其二

蠻洞深沉樓閣重雲峰娟娟玉芙蓉苔封石蘚
巖飛翠山鳥山花次第逢

飛雲閣禮大士

簇簇空雲芝愷飄一灣蹊徑駕扶搖鳴飛瀑布
千重雪吹落層崖似海潮

題贈趙四夫人壽圖

春雲雙髻玉精神下得崑崙日採真聞道錦堂
臨設帳筵前親作獻花人

賢姪娘子以扇索書戲占口號二首

漫將紈扇索新詩愧我才踈格調卑筆底蠅頭

隨意拂墨豨幾點黑離離

其二

墨花飛亂點蒲葵老眼模糊禿頰遲笑擲山村
痴老嫗不堪持去換鸞兒

贈美人 并序

琵琶美人清瘦比梅花賦此以贈令梅精見
之不當移置雕闌碧檻耶

壽陽宮裡競新粧彷彿衣分荀令香不用曲中

怨搖落定交春色護東皇

寄女姪哭其先慈六絕

南國珠潛海月微綠窓人去掩雙扉秋風亂落
金梧影楚些空歌魂未歸

其二

蕙幃風曳珮聲沉斷續文簫夜色深
茱萸粉殘花閣閉麝臍香冷鳳凰衾

其三

蘭香何意謫人間張碩絲牽宿有緣三十六句
花過眼又隨孤鶴向蒼烟

其四

蕪沒蒼苔絕履蒸曲房花冷合歡枝可憐油壁
香車路不似前春拾翠時

其五

自挑綵縷下鳴機燦爛雲霞五色飛一自針神
歸去後至今誰刺六銖衣

其六

涅槃已証雙林果優鉢長妍晝夜花泡影身隨
朝露盡三千一瞬熟桑麻

送表姪女吳夫人北上二首

中宵月落野烟迷江上征帆夜影低岸柳青青
總堪折也知腸斷灞陵西

其二

匆匆別語不勝情五兩輕風伴客旌忍把傷心

問行色金閭門外是長程

遊舅氏山樓有感二首

荒徑秋深草色枯空祠沙沒暗靈圖青山一片
聞歸鶴野籜含風夜夜呼

其二

莫將清淚拭輕衣載得新愁百斛歸從此扁舟
烟樹渺殘霞飛盡釣魚磯

寄萬娘五首

秦簫聲杳綵雲空子夜歌殘玉樹終一自鳳樓
人去後斷腸芳草碧烟籠

其二

低垂甲帳隱流蘇玉鏡愁窺鵲影孤寂寞舊家
雙燕子春來還入畫簾無

其三

梨花零落碧窓虛博士才情女校書鳳藻五花
推獨步綵毫飛送錦箋魚

其四

團團新月照雙眉
苔冷文絲絕履
蒸靜夜錦屏
蘭焰澁洞房
花老合歡枝

其五

蒼梧雲冷洞庭秋
漢水悠悠一望愁
夜月蒹葭
寒露白倦聽哀鴈
過汀洲

壽仇母五袞

洞口烟波歲月長
胡麻吹熟憶劉郎
一從望杳

仙人珮分得青囊肘
後方

泛舟翫芙蓉偶成三首

薰風蕩槳泛湖船
香細塘陰競採蓮
浦口雲光
吹作電白霞飄盡
是長天

其二

輕舸小小捕魚還
遠岸清溪曲幾灣
葉底羅裙
花底艷荻蘆深處
碧烟環

其三

館娃昔日綺羅妍
越苑今看啼杜鵑
自掛征帆五湖濶
浪花零落若為憐

贈金卿雲

錢塘松栢鬱層層
油壁輕車蘓小乘
笑結同心拾香草
更憐明月在西陵

泛西湖經西陵吊蘇小小三首

西陵風影澹輕陰
幽翠香寒墓草深
千古春堤香油壁
只今何處問同心

其二

蘇小門前啼鳥聲
石橋東去暮潮平
夜深吊斷淒涼月
歲歲愁心逐草生

其三

風環水珮已無聲
誰跨青驄陌上行
一段芳魂渾似結
可憐松栢自青青

見隣舟美人戲成三首

澄湖載月共乘舟
刻燭看花卜夜遊
疑似洛妃

鳴雜珮相携江漢弄珠浮

其二

絮柳鴉黃隱綠堤相逢暫爾復相違
相違應惜勞相憶見說明朝是別離

其三

輕羅曳曳怯春衣瓊戶沉沉玉漏稀
夜月忽聞江上笛長林啼鳥送人歸

贈馮師母老夫人二首

風霜搖落幾經秋何意追隨湖上舟
共話從前舊遊地熒熒清淚共江流

其二

蘭閨寂寂總消魂風細珠簾月一痕
為得故人相借問滿階春草泣王孫

送遐周弟北上武前韻六首

朝看鷓首發河橋夾谷鶯啼柳帶嬌
清雨渭城分袂處一枝輕折最柔條

其二

二月春深寒未消
單衣遊子楚天遙
忽聞別院鳴機夜
疑似金閨度剪刀

其三

陽關三唱渭河濱
鴻鴈天邊羽乍分
送別豈堪回首望
盈盈青眼逐征雲

其四

輕裝五兩伴行人
初月蛾眉皎似銀
對此不須

傷草色廣寒別有一枝新

其五

桃花春水木蘭舟
一曲驪歌江上樓
此去征驂似弦箭
故園明月思悠悠

其六

歷歷千山曉曉鶯
灞陵烟樹總含情
也知夜夜春宮裡
織得新袍柳汁青

游龍井滯雨漫成三首

玉液泠泠走碧沙
芳池碎璧散冰霞
花深古徑啼鶯小
黛濕雲寒染露華

其二

珊珊竒樹亂棲鴉
龍窟遊鱗嬉淺沙
繚繞青莎浮幾點
憑流恠石似靈槎

其三

細草輕烟小徑斜
半空寒雨洗亭花
山厨不作伊蒲饌
拾得松丸自煮茶

寄孟四娘二首

吳雲楚水兩悠悠
日暮懷人江上秋
千疊關山萬行樹
依依柳色武昌樓

其二

碧天清遠月如鉤
遙憶春閨霄漢浮
寂寂寶欄閑十二
白雲深處鎖江流

壽申太夫人二首

九影花芳阿母前
瑤池一熟景三千
傳聞結實

遺姬滿分得餘甘列壽筵

其二

八瑯仙韻五雲間紫閣觴傳舞綵斑綠野堂開
凝碧麗太平元老宴東山

春日四弟招飲舟過庠丘同諸母席上偶成
感懷似安卿娘子四絕

雨微風細漾輕流載酒尋芳郊外遊花草吳宮
渾一夢白公堤畔木蘭舟

其二

清溪小築雨中樓目送春帆帶雨流自古貞娘
冷香骨殘英飛盡故宮秋

其三

說法生公石點頭翻經香雨黯荒丘池中劒躍
龍文吼靜夜林空山鬼愁

其四

琵琶聲咽鳥聲柔日暮孤蓬何處投莫怨絃歌

引淒惻幾將生事付東流

送溫老親母夫人北上五首

揚子風多水國涼
征帆一夜掛吳霜
白蘋花散煙蘿冷
嫋嫋雲波引棹長

其二

聞道離亭柳帶黃
關山玉笛滿河梁
灞陵咫尺天涯路
無限秋心寄蕙纒

其三

宣麻十道出明光
綵鷁雙飛入帝鄉
夾路笙歌擁翠幟
笑看千騎列東方

其四

香案披書侍玉皇
綠窓仙吏畫眉郎
嚴程早副為霖望
湯向鄰姑道吉祥

其五

秋空莎色冷橫塘
陌上雲車碾七香
此去鳳池煙霧裡
朱霞掩映紫薇廊

班婕妤

露井秋桐落
葉初上陽宮
女賜羅襦長
門盡日
歲蕤下寂寂
蒼苔步廣儲



絡緯吟卷之九

詩餘

過采石題蛾眉亭調寄霜天曉角

練波飛渺月掛弓彎皎雲濕林皋香封幽氣土
花叢老風撼蛟龍嘯江白漁歌杳樓瑣冷烟迷
眺剝繡斑平沙曉雙巒闔碧寒玉雕秋壁兩
道凝螺天半橫無限青青色拍岸濤聲急似鼓

東海徐媛小淑氏著

國家圖書館 NATIONAL CENTRAL LIBRARY, TAIWAN, R.O.C.

臨邛瑟綠窓鸞去鏡臺空留得春山跡

石湖弔古調寄霜天曉角

雲流石嶠空翠連煙草豸相祠湮緱山冷月玉
笙吹杳見幾樹幽楓呼鳥梵宇高竹僧悄干
霄事業兄弟聲華烈詩酒詞場亂野狐回首文
章沒曲曲湖梁白一片秋光織總舊日梁間燕
子歸也擬作尋常識

步韻咏吳延陵郊居小齋調寄漁家傲

板扉小隱清溪曲夜月羅浮花覆屋木籠憂憂
搖生穀莊田熟桔槔懸向茅簷宿青山一片芙
蓉簇林臯逸韻颺橫竹遠浦輕帆低幾幅濃睡
足笑看小婦雙鬟綠

九日泊舟豫章道中調寄霜天曉角

帆輕一扇曉色碧漣秋岸林破寒煙星河澹落
青山如染露浥芙蓉茜翠澁枯棠瓣傍疎柳西
風幾點闌鐸沉雞塞遠行行尚緩家在綠雲

天半念歸舟遊子一片鄉心撩亂菊黃金綻滿
首揷茱萸遍兀坐逗遛江畔對旅鴈沙汀眴殺
白蘋秋苑



絡繹吟卷之十

東海徐媛小淑氏著

詞餘

春日書懷調寄綿搭絮

薄寒輕悄紅雨染春條翠襯香芸一片煙絲軟
蝶嬌楊柳色子規聲小卜歸程金鞭難拗玉關
人老經春望斷黃麻詔三歲瓜期折大刀

其二

棲遲荒檝落月戶梁高露白中庭風細雲波竹
影拋聽銅焦旅鴈天遙凍蘭膏碧熒花笑江南
夢曉使司馬離腸似擣甚日脂車萬里橋

其三

東風一片花落燕泥刊水溢芳瀾醉纈苔痕鴨
綠錢銀屏掩小扇齊紈五雲深抑揚絲管桂戶
嬋娟團團飛鏡玉生寒露珠低濕滑軟雲鬟

其四

九枝光燦寶輪垂照圓水簾漫捲墨池紋縐綠
波寒閑亭院松風夜闌真堪羨羸女乘鸞桃花
夾岼藐姑仙朱顏若蕊幾時得尾青牛紫氣到

函關

其五

殘霞如茜玉斗轉闌干徘徊凝望碧雞關外漲
狼煙天涯草綠滿秦川錦字書衡陽回鴈登樓
王粲眎殺平原舊苑到如今花老鶴鷄原

其六

蘸雨香蕪烟籠柳色踈遠山幾點晚雲微黛畫
屏孤闕榆墮驚飛夜烏空亭暮青笳夜呼鴛鴦
堯路遍春墀王孫草舖對芳辰結思怨征途

春思調寄綿搭絮

春歸院小風薄淡雲飄戶外山青繚繞吹絲送
百勞萱花朝爆葉垂條正好向曲江詩酒玉板
文韶悄陰陰新鶯官柳百轉枝梢爭羨那醉清
平詞調錦官袍供奉謫仙豪

其二

峭寒微扇輕羽逗汀煙攔檻香凝翡翠池塘碧
玉聯最堪憐笛引秦川碎葉城蠟螭塞遠信杳
魚箋金閨夢破催虬箭望斷王孫草色芊

其三

艷紅飛靄曉色醉蒼苔點點青山翠襯晴螺拂
黛排覩春來蝶軟蜂猜懶雲偏日低窓罅窄碧

茵如灑暗香籠重樓十二玉笙寒吹徹小梅開

其四

美人春倦柳色畫樓閑簾影踈踈寂寞中庭冷
珮環凍瑤鈿露點風鬟一番雨梨花落遍鶯老
花斑怨殺那空床思妾恠封侯夫壻在關山

桂枝香寒夜書愁

清霜點嶠玄雲天老四野來鶯管聲繁寒堞上
漏籌頻報聽簷鈴逗風聽簷鈴逗風恍一似舊

日笙歌雅調更添我迴腸縈遶轉眼總虛飄池
館人歸後朱門氣寂寂

其二

寒風嶮峭黃沙捲草瑤天凍碎墮瓊芳九微燼
博爐烟渺正嚴威勢侵正嚴威勢侵耽沉疴倩
誰相告着冷暖有誰相勞空自旅魂銷泣盡燈
前淚家園已棘蒿

其三

俗情已掃生緣未了沒來由兩字功名縈絆我
一生潦倒看澄月印潭看澄月印潭恰一似重
昏夜曉何日遂皈依真語及早去脫塵囂回首
青山近仙娃拂袖招

啄木兒 感悟遊仙

風雲態幻世情蒼狗白衣屢變更識得破是我
根芽早還個本來心性瑤琴懶把危絃整茗華
聲杳禪心靜好向貝葉翻經月下聞

其二

如來意信有真始悟慈航不悞人一燈影懸照
河沙諸天花齊散繁英茫茫枯井深無綆洋洋
萍蒂渾無定何事浮生空墮沉

其三

花稍露水面痕逐浪掀風不耐禁人世上日老
了愁人日輪中何必去追輪一朝勢竭黃金盡
茂陵楓柝蕭疎冷總有轉日的威稜難挽寸陰

其四

空王影法相身寶月華鬘夙有因滴甘露布濕
醍醐搗松根與雕飯同蒸花生琪樹婆娑景水
輪宛轉璇宮淨更有那天鼓仙韶一派生

感懷追逝北新水令

一番塵話夢栩栩空勞了半生心跡當日個帝
城春色滿今日個故國冷烟迷浮名似片瓦飛
飛浮名似片瓦飛飛怎如那巢雲的伴孤松在

萬山深處

南步步嬌

衝鋒蹈虎名韁事七首蒼龍勢無端貝錦詞以
馬為廩憑將心指何苦去辨是和非青蠅那顧
你真和似

北折桂令

沉埋了一場心事已成灰說甚的鷹揚廊廟總
休提至如今綺疎寂寞冷胭脂芙蓉帳掩孤館

人非度流光更如涉歲歷寒暑那辨推移載愁
端了無歸計我呵如今好息機莫疑怎得向叢
桂山頭相邀佳趣

南江兒水

休問君平技休吟澤畔詩大都來五行已註生
前事勤王的不把黃金鑄負薪的何處投知己
總是一場兒戲到不如去飲炭吞冰跣足徉狂
塵市

北鴈兒落帶得勝令

回首事總乖離千年調已傾歌想當日個繡戶
文楣列着錦圍青玉案張着蓴鱸紫葡萄泛着
瓊卮寶雕闌栽着蘭蕙百和香燒着獸灰怨春
輝忽隨秋去把從前事猛追再思徃勞我神呆
意痴呀一重提一重心醉

南僥僥令

鵲印流塵暗貂冠總汗泥便有那層臺花塢蛙

聲磬怎得個環珮歸來月下遲

北望江南

呀我只道畫堂春晝暖樂庭幃又誰知人去會
無期經不慣別離况味事與心違按歌喉送不
到愁人枕際我呵淚灑灑痛伊淚灑灑痛伊這
的是斷腸深處嶺猿悲

南園林好

住幽居伴山人鬪雞挈五老籬邊奕棋徑卧着
乾松蓬杞吸石髓餌玄芝叩杖舉竹龍飛

北沽美酒帶太平令

看玉喬鳧鳥歸看王喬鳧鳥歸仙掌上白雲棲
訪故友山陰載酒回喚秦娥採珠拾翠聽青童
演出新詞茶烹着武夷雀嘴松棚上掛着軍持
矮茅簷牽着薜荔池塘內覷着遊魚我呵笑勞
名的朝東暮西白眼看趨蹌路岐呀亂黃塵再
不上俺緇衣雙袂

尾聲

蠅頭蝸角誠虛器
瓦枕上黃梁一覺起
從今後
門鎖蒼苔護紫泥

四時寄生草

春

嬌暖香林簇飛絲疊翠窩
玉堦草色蜻蜓卧
銅駝紫陌春無數
揚揚曉氣重欄度
不知生水夜來多
見銀塘迸破玻璃顆

夏

翠剪槐陰塢湘簟抹畫羅
鞦韆月午香鬟墮
輕紈暈濕薔薇露
流螢燁燁晶簾撲
蘭膏繚裊綵屏圖
荷汀倚扇烘雲宿

秋

金井桐雲護琅玕
玉粉鋪冰輪半隱鴛鴦戶
秋零亂灑梨花幕
香蘭笑吐芬幽素
閨人凝思咏
蘼蕪悵王孫望杳章臺路

冬

雪嶺臙脂凍宵寒瘦玉柯香檀泠泠柔煙鎖竒
花點點飄瓊絮棚棚戍鼓街頭邏絞綃褥穩麗
人酡醺榆月冷雕欄暮

四時江兒水

春

寒食厨無火清明水濺秧燕歸舊壘把新泥上
池塘春曉縈蕪蕪長棋枰竹塢閑清賞院宇鞦韆

輕颺香雨絲絲點破柳梢嬌放

夏

五月榴花吐園林蝶粉黃翠盤珠露池心漾玄
鬟碧黛粧兩兩紅牙象板低低唱別浦蓮舟相
盪蘭槳齊開攪破青萍白浪

秋

霧捲冰天薄晶寒水殿涼盈盈碧影璇宮敞清
光夜永浮仙掌秋宵玉笛瓊樓上明月關山嘹

曉逸響飄揚送入繡幃羅幌

冬

輕絮鷺毛疊寒驕翡翠窓獸爐煙火氤氳恍青
霜細結明璣網冷風淡靄穿書幌朔氣寒笳悲
壯邊塞荒涼胡馬薊雲遙望

二郎神

朱闌右見幾點冰瑤飛逗爐裊輕煙青縷瘦踈
櫺嶠峭颼颼鬢影生秋殘燈小館吹來玉笛聲
柔旅思羈腸耽病疚偶省起我故國白蘋渡口
曾繫木蘭舟淒涼舊壘今來麋鹿亂荒丘

集賢賓

戍兒漏鼓寒角舉重樓看落月汀洲聽籬犬籠
雞別院凋隔簾虛玉鈴兒相扣正是離人無寐
憶往日高堂厮守池塘鴛鴦春草夢向珊枕畔
依稀細語窮愁

黃鶯兒

莫話昔時游總翻成滿目愁舞衣歌扇籠塵垢
煙封翠樓臺空總幃東皇無主鶯花儘謾追求
舊愁新恨并結我寸眉頭

猫兒墜

石頭城蕭瑟目送楚雲流隱隱鍾陵白露收望
平江一帶水悠悠牽愁見幾處衰柳斜陽天際
歸舟

尾聲

吳宮花草還依舊爭柰我親遠天涯淚滿眸怎
比得勒石曹娥芳書姓字留

絡緯吟卷之十一

東海徐媛小淑氏著

文部

序

送孟年伯母還楚詩序

風雨暮秋搖落河橋楊柳露華陽九凋殘山鬢
茱萸忽回天上之星槎已架人間之懸榻某也
材慚樗散質怯婆娑幸附驥尾之青蠅喜傍薰

葭之瓊樹兩載相依每仰栢臺聆玉語一朝怨
別已傷雲幕瞥朱顏永諧君子之交情難並芝
蘭之覲面遺來翡翠芳梳草髮分光奉去紫蘭
香共鬢髮彌結菜釜生魚每惠郇厨之玉饌素
書傳烏式遵孟壺之芳規悵對面之天涯嗟舉
頭而日近徒賦江淹之別恨空悲阮籍之途窮
念此興言黯然魂斷故人尊酒悵惘于臨水登
山野外鴻歸極望于灞陵南浦握梳月于遐荒
愁聽晚桐吟吹追駟車于沙漠復嗟霜鴈嗥天
分手須臾送君萬里不能覓言笑于尊前永願
寄心期于別後索落離懷不勝歧路之感粗成
短句聊申彤管之思

傳

林母徐孺人傳

歲在玄默困敵月臨仲商則壯有雲間之公子
姓林氏而麟其名手其母夫人之行實介夫子
而索予文予惟笄髻孱資紘紆是務未習詩書
安知鉛槧乃欲擅閭外之文詞闡閨中之淑順
是何異問盲者以道南轅而北其轍耶第以林
君明命孝思維則夫人懿德壺範肅瞻是用不

諱無文授簡而為之傳孺人者徐姓南浦右族
南疇公之令息也翁素有隱德慷慨嗜義周人
於急里中藉藉稱長者母孺人張柔順莊嘉名
門良姥爰生孺人規容履度蘭藻含章戚里揚
聲芳庭挺秀德承燕姑之香工效徐吾之績翁
與孺人捧之如握趙璧連城未忍輕字迨乎太
卿林公輝彩公車滕淑人尚難麟趾公之王父
母稔知孺人賢婉納幣迎之遂詠河洲之章備

衾綢之數貯以別館有令聞焉尋以曾王母太
淑人王母王淑人偕之就舍琴瑟既調條枚無
伐居恒恭謹溫慧貌降體和與滕相好如女兄
弟衆莫不嘖嘖謂舜之二妃衛之莊媛德有逾
焉承兩太母溫順婉容怡聲下氣克謙克競曾
無間色并無怠愆以故太卿公倍嘉禮之如淑
人禮每兩太淑人紉饋之具必飭令檢治食必
手調非是弗敢進也衣必手製非是弗敢御也

晨昏展敬事極於移天蘋藻挈誠義申於中饋
櫛緹衿纓佩悅獻蔗箴管線續靡所不飭用抱
衾之勤肅代操箒之拮据親承兩太夫人顏旨
贊襄太卿公誠孝者孺人也至如宗黨饋遺歲
時伏臘出納應酬無不悉洽太卿公旨公雅好
對客論文輒連朝卜夜孺人則躬持精糈以進
所蓄花勝金篦悉付酒家胡以佐賓客惟恐賓
不懽丙夜尚操作機杼刀尺聲軋軋不休未嘗

以簠簋不掩為公內顧憂蓋賢姥鬢髮倚明鏡
而辨伏雌織婦機床聽寒螿而催絡緯矣已太
卿公歷政兩都位居華要輒以孺人從宵勤暮
勵奚減雞鳴之風匡贊箴規無愧脫簪之義時
太卿伏枕室中忽感異夢戶列鈞天之奏庭輝
絢綵之霞有物如麟投懷而出孺人驚寤爰誕
林君遂以麟命帝錫國香徵蘭祥於庶妾天陳
廣樂卜翟子於符文保世有人亢宗不乏賀者

咸歸德孺人孺人愈自抑損不敢居也即脫諸
孺人之腹而撫之滕淑人之懷孺人弗敢有也
滕淑人有之以為子孺人無以為子也更戒他
人毋泄其非滕子以為已子以全滕淑人權而
孺人故若暝然無聞也已林君弱且勝冠矣主
冠者為白其始遽然駭且悲入詢之孺人而孺
人故隱忍弗啓也已林君勝室有婦偕子婦問
寢視膳而孺人且遜避弗納也孺人以已子非

已子滕淑人鞠易子而相仍為令噐兩默不言
雖比於古之分形合體薦御授襁者曷以加哉
至居兩太淑人喪則焦毀踰情儀範彌肅襄舉
尤工一協於禮聯諸姊姊以遜御下隸以和生
平曾無愠色是為衆所慕而歸焉滕淑人之寢
疾垂歿也生時以好施傾其橐孺人為出已資
償之翠羽實於空箱明珠宛焉如在俾太卿倍
憐其檢束之勤則孺人陰為曲全之耳比滕革

而易簣孺人哀毀罔措藝鼎籲天乞以身代既
訣則傷踊破涕呃呃為勞林君亦悲楚幾絕孺
人假以示諭解慰而已則神銷肌憊矣更以戶
樞稟總諸孫繞膝悉藉撫摩時其饑飽燥濕雖
在疚乎尚勤課其群下執持脩脯蓄釀漬醪以
備歲時孺人蓋同柳園操杼桑津浴蠶愈恭節
儉之心實秉憂勤之德矣林君既免喪衆有勉
其謁選銓曹沾祿以養君以慈老在堂憂形於

色孺人曉之曰蘭室之士有常賢無常遇顧自
監謂何耳曷為崟嶇衢路折腰五斗局促轅下
耶况有先人之遺卷在惟是切磨砥礪著業將
來勿用蝸角微榮營營馳逐以故林君徘徊依
戀姑自珍焉以俟異日之鵠舉鵬騫實奉庭闈
之慈訓耳毋儀哉與義方競軌矣晚年恬情釋
典絕甘茹素食不二簋衣不重飾林君每將甘
臠為染鼎指更進片臠置之弗御聊取一二蔬

烹而已其守儉居約有如此者或歲時懸悅菜
衣戲舞輒追噓飲泣愀然失懽曰未亡人何意
娛樂耶竟止弗聽或花辰月夕林君將母板輿
樂志孺人輒叱之無縱云有太卿遺訓在耳蓋
用曹大家之明訓執宋伯姬之苦節其共靜貞
簡有如此者居恒畏風露沾之則頭為岑岑常
密坐一室無何感河魚之恙林君為精理刀圭
和瓊膏玉屑以進而孺人稍瘳林君喜躍曰母

得以耆頤綿筭玩諸孫枝振振頭角良足快也
忽於庚戌首夏舊疾陡舉四走醫巫終無起色
胡香鮮西域之人靈草絕瓊田之路留年不驗
於龍符遣疾無徵於龜散嗚呼痛哉林君哀念
劬勞乞身露禱祈之百誠迄無一效一日據床
而命林君曰為我檢奩貯無恙乎則呼婢子侍
櫛整衣端拱手菩提珠稱西方佛號喃喃不休
氣惛惛欲絕矣而君哀情慘切呼號動天孺人

徐曰無擾我我已得至妙真諦矣目遂瞑儼然
正坐不失常儀捫其頂氣烘烘如蒸肢體柔和
無改玉色嗚呼此真蟬蛻耶羽凌耶或駭驚命
駕陟泰華耶抑乘彼白雲遨遊玉京耶嗟乎孺
人一善女子身耳乃能薰脩堅懃超離五濁心
依八覺理會三空游智刃於檀林泛仙航於法
海了然解脫言象兩忘此豈人世凡流可比肩
者耶此時鹿苑鳴迦同登妙會珠林香象共躡
蓮花長夜城中翻為極樂土矣敬讚休風永垂
貞石用彰賢範庶播史臣

東海生曰女無專行素德是尚懿哉孺人令淑
早聞芝蘭獨茂敬愛天情言容禮典特達鮮矣
少長則望重璇閨勝婦則芳流宗黨肅慤以侍
尊章琴瑟以和君子行身之準動合閨箴履度
之端足稱壺式可謂七德騰徽四星連曜者矣
其他蘋藻絃綆盤匱鹽米猶其細者耳至若飯

心白業垂訓青緗繼華紳之餘緒襲世胄之墨
香非孺人慧根夙植教誠素閑而能然乎哉嗚
呼賢矣

頌

性明師頌有序

蓋聞清商勁而素絲淒玉露凝而幽蘭秀蒼
山翠幹經寒雪而常新陰谷玄冰歷青陽而
豈泮是知德瑩崑璧價溢連城清徹噲珠光
盈照乘士高介特女貴孤芳良有以也已酉
歲杪余奉兩先人靈輻卜寢於鳳皇之麓廬
側有老尼薙草結禪關接墓田之右尼即地

主系出於孫幼懷貞靜長慕玄脩禽委張氏
機緣事阻嘉姻雖定於絲牽醮禮未行夫禱
結瑤臺烟霧望杳仙童碧水漣漪淒迷錦羽
師乃顧圖史以羨栢舟殞丹誠甘同化日遂
爾託跡禪棲凝情定室青眉苦志月冷雲房
白首寒閨香濃佛座每向人匍匐稽首欲託
詞章宣素心於末景附琬琰垂不朽於千秋
余自媿踈庸其敢奮筆詞林唐突西子抑何

忍掩芳幽草埋沒微猷遂不辭鄙陋率爾操
觚尚賁節以勵高風用戢辭而頌潛德其詞
曰

德以實彰名由行造惟君峻潔察身皓皓風稟
粹真獨膺淑抱夕惕晨兢好脩若澡霜凜嚴操
氷持雅道簡約素風飲荼茹蘘未曰于歸亦矢
永老死誓靡他栢舟完好斗室瓊瓊愁腸欲擣
碩人之邁澗盤是考棲志禪林曳緇披縞大乘

皈依琅函法寶清磬明燈空王是禱口海溼波
微言必討寂靜蕭居風蒿露草萬境空華六塵
淨掃肉面金光枯骸木槁令德孔昭含章振藻
卓爾高標直凌蒼昊僉曰休哉展如之媪凜冽
光儀樹聲霞島

大士頌有序

予從宦古梁夜夢一幽室中三四優婆夷齊
聲誦佛忽而陰霾晦暗亡親徐至于亟令鉉

兒隨往郊外法筵聽講須臾復歸則天日豁
朗門徑除新老親從戶外來指予云池中蓮
花盛開盍往觀焉即尾之行不數武果見石
池寶花金色水碧玻璃香分彼岸遽然而覺
漏鼓下二斯非靈通幻化寄夢寫形何以有
此追念先人涕頤交下曉起熏沐稽首懺悔
至尊謹書普門妙法蓮花經一卷仰祈二親
身登天府業免輪迴樂土同歸慈航共載復

作頌曰

至慈為本普門自在渡海六航超生三界滿月
華容莊嚴妙態救苦尋聲群品是賴大乘照覺
孽結盡解阿鼻刀山了無障礙火宅熱沙轉眼
清快稽首世尊願垂廣大俾我兩親早離幽昧
不懼生愆悉脫鬼債寶筏為梁金蓮作蓋一切
有緣同登法會

又大士頌

淨聖身慈悲態足底蓮花觀自在尋聲救苦阿
鼻開清涼寶筏金航載一切火宅與刀山轉眼
便是玻璃界圓通徧滿天地間種種妙法獲脫
解所遇同歸極樂土念念西方無罣礙

趙夫人壽頌

石壁春融玄池流滴瑤草龍耕精桃呪實服散
仙姝訪真靈匹地接鴻濛壇通太乙大椿景齊
小有天密瓊錄名鐫胡麻芽茁玉曆三千頌從

今日

于貞姑頌 有序

于貞姑者吾蘇于翁之弱息也獨茂芝蘭早
聞令淑閑箴規於閨則習典禮於公宮貞節
峻於寒松韶儀麗於溫玉璇閨春曉厭看欲
圃之繁華蘭砌風和惟聽法樓之禪誦心燈
自朗意蕊常飛夙有慧根解浮生如風中野
馬生來覺性識萬緣如鏡裡空花究釋典於

垂髫妙契三玄之諦了真空於總角幽探九
帶之禪白業潛脩金篋猛刮蓮花口吐將廣
長舌盡抉真詮貝葉手翻向旃檀林飽叅妙
果悟香勃發普薰濁界之汙智鑰一操頓闢
名關之鍵天桃無詠耻結悅而施衿萱草相
依願承顏而養色至孝薦於庭幃懿德溢乎
閭里以故天寵崇褒龍章特舉華坊雄峙旌
令節於衡門芳姓遐馳流芬香於丹史實三

吳雅秀女士人豪是用不巽疎庸聊申俚語
用備采於風謔敬闡揚夫淑範豈直嘉吾邦
之縕秀生此碩人抑亦發潛德之幽光抒吾
欽慕云爾遂作頌曰

吳山蒼蒼吳水湯湯爰有賢媛產此名邦棲心
香界馳想空王口鮮言笑志絕貪荒心同匪石
節凜凝霜戒舟夙駕聲輪早揚優鉢飄芬摩尼
耀光說偈花飛談經雨涼吼音師子桂角羚羊

末利夫人耶須女郎行以律脩德以法彰似彼
春華枝傲枯香似彼秋魄寒輝吐芒廣寒吞藥
玉斧工忙綃室鳴梭機杼夜央寧比吾師一念
西方我作此頌海印發光

復作大士頌

空劫認非空薰聞香即戒常以靜觀心見彼莊
巖態覺性自圓妙生滅及住在滅盡已滅因本
始詎違邁既悟昔往根復感生生派愿垂廣濟

功同上蓮花界

孫夫人頌

英英夫人惟邦之禎琢相雲邃構宇龍津玄圭
執球翬翟垂珍泥金寫幙標額塗銀章懸紫鳳
腰玉紅麟矯馬行祠土人是湮赫赫威靈所求
必臻假令夫人佐劉秉鈞母儀天下炎祚用燁
胡天不造鼎足遽淪金牛為馬閨位居宸群雄
崩裂帝業頽湮吳官草莽蜀地迷塵孰是夫人

千載猶新

誄

先人誄

有序

嗚呼哀哉龍蛇在辰君子道消吉凶後先天壽
同凋嗟茲北邙白楊蕭蕭譬彼望舒有虧有盈
痛此萱椿條葉頽零哀哀我親素質含瑛德洽
造物志合天真皇祈不察殲我碩人百身寧贖
一去忘返假羽景雲天高路蹇何以弔衷淚盡
玄旛何以誄德願托斯言乃作誄曰

烈烈我祖自徐啓疆遡厥苗裔伯益是昌族由
令滋名以德彰秉身操行為龍為光策名天府
實邦之璋篤生我父出自有張人稱騏驥千里
翱翔早振頭角白眉鴈行逮我王父結綬承明
比隣者董族盛冠裳為謀好速已氏者昌鳳卜
是吉和鳴鏘鏘厥我外祖古史之良樹位鼎台
秉機廟廊分投王父金固蘭香心照神接合璧
是賞庶幾比肩以事君上云胡奄忽乘雲帝鄉

一疾不返星隕其華丹旒歸來隨風飄揚祖溘
朝露王母在堂遺諸伯叔軫疚彷徨父也髫年
大事其襄斧藻砥礪肯構肯堂撫茲弱弟克矜
克讓眷彼萱親夙興是將養羽外家鵬息鴻歲
一經屈首囊螢夜窓翁愛玉潤授以青緡黌宮
早遊青衿踟躕崑崙試御汗血騰驤母氏于歸
允迪前徽婦順克諧四教是依聿來作妃虔恭
慈帟怡如藹如克敬克婉蘋蘩是供締綌是濟

家曰令儀邦曰淑媛執事有恪仁風是扇健持
戶樞儉約自茹允釐中饋敦睦里閭推恩小異
采葑采菲佐理君子側躬下體君子厥昌奕葉
褒光濯足龍淵奮翮凌蒼南宮射策執作爰斯
委任水衡百工並舉惴惴苦心虔奠綜理精能
徹鑒誠則達主勤劬孔多恩波下沐晉秩同鄉
嘉以寵服鳩役慈寧晨惕夕肅省利節費勞謙
圖計耿介執直不干權勢孤子日將復與世戾

衆口沉木芳草為壤貝錦雌黃謠詠成黨拂衣
歸來五柳門栽懸車避囂叢桂齊開孤霞縹影
皎月盈苔撷情春卉託思秋容東魯慕玄南郭
潛踪鶴氅盤桓山翁野農曉春課奴訓婢夜織
南山一畝唱和自適惠藥問疾厝歛遺骨施德
遐宗提携子姪存恤寡孤捐衣推食懋哉義問
遐矣仁聲如露之滋何草不榮懿德實嘉宜享
遐齡命之不造數與禍丁有耳無聰天聽冥冥

嗚呼痛哉母氏遘患身攬痼疾哀我慈帟一旦
埋骨百草徒窮良醫無術蕙性香銷蘭儀景戢
叩閤無力淚盡輕紈銀缸夜慘懔帳飛寒曾未
及稔嚴君伏枕一疾奄綿忽焉長寢藐孤襁褓
吉凶寧審病女在疚永訣無引笄笄遇災門戶
成乖百口張皇黃金散灰惴惴諸嫠泣如雨零
眇焉弱壻隻翼零丁存者吞聲亡者冥冥噫噓
嗟吁為善無徵貞不常祐如何斯人未卜其壽

不施其身而于其後消白骨兮陳根迷夜臺兮
昏晝曉滌魄于咸池暮馳精于壁斗顧一晤而
無從追往時而空惚望歸魄兮聽鶴激楚些兮
抒衷徒擗標以撫躬心摧剝而哀慟呼聲摩空
迸淚泉湧祖陳二筵旌拂雙控陟屺兮雲籠松
楸兮改容嗚呼哀哉白華凋兮遊子窮枯蘭銷
兮庭帟空藏精誠于玄壤委浩氣于秋風行雲
結兮木魅嘯玉笛悲兮山鬼恫恨千載兮成血

哭有聲兮思無窮

墓誌銘

屠母黃孺人墓誌銘

屠母黃孺人者予兒媳從父敏瀾屠公之元匹也。以萬曆壬子之春疾終於寢逮乎癸丑之秋予禮古天竺先生而歸途出構李媳之母氏逆我水濱宴我于木蘭之上我兒媳奉其從父之命出其叔母黃孺人之狀垂涕洟而告曰嗟乎此吾叔父之女姪黃夫人操不律而狀吾叔母

者也黃夫人于媿為女兄弟其文才藻繪上可
方班姬下亦不媿曹大家中所載吾叔母生平
懿行甚悉吾叔父將以來歲春王之月舉其纍
裡而卜上峽蓋窳窳行有日矣吾叔父念所以
不朽吾叔母者獨有形管之芳華勒之麗牲之
石用以賁幽壤而耀來茲而我姑迴文紈扇不
減名姬倘哀其衷而錫之片辭以華袞其枯骨
庶幾吾叔父得藉手以報同牢之誼而雪奉倩

之悲乎余自媿無文無以闡孺人之徽音懿範
而迫于媿母之命不獲固辭遂忘其蕪陋援筆
而為之誌按狀孺人諱觀嬌姓黃氏樛李之角
里人也門稱通德文彩耀于儒林譜系名宗根
蒂固同磐石車書禮樂爭誇紫誥千篇卿相公
侯奚止朱輪十乘賜書未盡古鼎猶存家聲冠
冕于本朝人物琳琅而滿目父鯨鷹繡巡方虎
符臨鎮一道之風霜掃境九重之雨露隨輪伯

氏正色鳳檢雷行烏臺霜肅共仰刁曜邊臣之
節咸稱楊秉宰相之才仲氏洪憲鳳藻騰文卧
看八磚之日影猶子承玄龍圖外攘坐清列郡
之炎氛父子聯榮無歆向異同之論弟兄接武
盡機雲俊爽之才孺人生鍾蕙秀長擅蘭芳早
茂徽華夙彰榮曜言成軌則常受教于公宮動
合儀章德有聞于師氏詩賡柳絮寧讓謝太傅
之名閨詞解色絲不減蔡中郎之令女芣苢采

采家有和平之風葛覃萋萋身躬勤儉之德逮
乎瀉水釐降有媯來歸和聲叶鳴鳳之占坦腹
中乘龍之選宜其家室及夭桃之九華求我庶
士迨標梅之三實授巾沃盥視寢膳于晨風秉
杼鳴機佐咿唔于夜月恭非貌飾孝出性培猶
且樛木葛縈逮衾裯之肅肅螽斯羽揖宜子孫
之繩繩可謂內則肅慎中饋虔恭者矣亡何勞
瘁傷年沈疴委頓香銷胡地之玆草絕瓊田之

路朝陽晞露芳薜雕顏月冷囊琴絃折離鸞之
曲風摧庭樹柯披連理之枝秦樓聲斷文簫玉
女光沉寶婺以甲寅春月之吉卜葬於
原敏瀾公傷神秋月掩淚長松空悲季直之留
書徒悼安仁之長筆仙踪永別鶴馭何年白露
凝楸黃埃委榭神光離合陳王之惆悵堪悲雲
氣徘徊楚后之留連如在乃作銘曰

陸終建國江夏開都人挺英傑世擅雄圖繡轂
連鑣香貂接珥乃生令淑彤管有美珠產照乘
蘭錫國香邢衣裝服宋子河魴百兩言歸三星
在戶愛敬天成言容有度既全婦德還稱母儀
方之棠棣譬彼螽斯義越江沱仁流櫟木浴蘭
供衣鳴機佐讀思洽宗盟勤持閭政造物何垂
寸陰易竟藥謝金膏光埋神鏡嗟美人之一去
似飄英之委徑金戶聲沉玉樓人靜幽壙蕪深
荒埏草勁嗚呼哀哉山青青兮水泠泠雲漠漠

兮天冥冥山門迴帳兮泉室移燈鸞悲失影兮
劍咽孤鳴淒其趙瑟兮哀愴秦笙千秋萬祀兮
扁此佳城

悼詞

悼冢孫文

癸卯歲旅白下長倩奉使閩中予亦得返吳中
焉便間與鉉兒委禽乃攜李右諭德漸山屠公
女孫孝廉思常公季女也婉孌嫻默克循閩規
適長情有正郎之擢不果入閩遂鼓秣陵之棹
偕兒與媳行未幾而娠將期就館阿翁復有滇
南校士之遷泛江而歸抵家兩浹旬兒媳免身

得雄是日作湯餅會孫生也脩眉廣額質朴肌
豐王父目之曰偉哉吾孫他日當大吾門耶予
戲翁曰似阿翁承旨滇中為督學使者足矣翁
曰兒生三日當為其書名昔魯桓公曰生與我
同類當命之曰同予固素喜古人之遺編或能
繩而類之即以同字字兒當效阿翁之嗜書可
也王父極憐之日如握拱璧而掬照乘以兒始
生未勝跋涉姑緩滇中之駕伺見百辰後或勉

勝就道尋以媳之歸寧抱甥謁外祖攜李種痘
者衆十不全三四兒此時尚舍外家急買舟返
俄以患癩復滯風寒頽然沉苦者累日遍告醫
人紛紛未究其症遂殤焉王父為之哀泣輟食
予亦悲悼不能已已天乎天乎是兒何辜早奪
其壽薜華耶朝菌耶鏡裡花耶水中影耶杳杳
冥冥不識化為何物嗟哉衆傷無覺爾獨先期
邈邈咏啼魂將何歸一脉幽幽大塊雲馳興言

援筆心悲意摧乃作辭曰

惟吾孫之早逝兮未百旬而數窮畧授色而解
 情兮在襁褓而告終矧疊疊之末景兮望玉樹
 之龍葱喜潛珠之來掌兮將護汝於驪龍何朝
 陽之煽影兮晞清露於芳叢彫景命於超忽兮
 罹汝咎之厥躬揚微靈於浩渺兮捐纖魂於埃
 濛襲螢火之流光兮依宿草之薄衞去慈母之
 衿懷兮離保媪之邃秘或化為龍或散為霓彼
 孤蘭之嫋嫋兮抽柔幹以滋容追弱子之早世
 兮傷庭枝之殞風我將顧爾形於太素兮索爾
 魄於崆峒徒佗佗兮永懷對丘壠而衷忪哀及
 兮痛轉劇淚盡兮思濛濛

祀文

祀湘夫人文有序

洞庭之濱瀟湘之浦蒼梧帝子在焉傍九疑而
鄰雲夢枕五湖而控三江夫人係陶唐之帝子
虞舜之后匹舜以巡幸而出二妃不能從憂忒
遺世即以玄宮寄之予以蕪水之役經茲大江
望彼川原秀色靡麗白雲霏霏恍若帝子在焉
雙翼凌風若與之游舟楫星馳因循而去影耶

霧耶繪耶夢耶了不自知回首悵惘遂成斯章
以祀之其詞曰

肴羞列拱四酎餞瓊膏金液之觴琳琅合徵八
音奏皓露秋霜之曲維月次無射之素辰停橈
江滸瀝誠水心涼陰媚節鳴颺之氣拂林蘭鷓
邀靈凌波之武斯度願祈迪降瑤筵寵臨祀位
乘迴風而登綺楫泛碧水而宴芳舟於是翠葆
前開星驅之騎始發丹軒駢聚月羽之隊徐分

青童駕白虎之素塵王女引朝元之華使左伴
九河神女右侍七夕天孫率憑霄之竒鳥袖青
砂之珠塵拊雲和之瑟鼓碧琅之璈赴節而歌
曰泛層波兮浮清流結柔風兮倚桂舟豈今夕
兮與爾游悵明辰兮隔山頭更令婢子卿卿演
幽蘭白雪之曲而捧碧彩香螺之卮進崑崙丹
露之釀為上客壽須臾入座揚星眸而剪翠掃
弓黛而如張被五色曇花之裘繫八寶水犀之

絲絲
帶垂七蓮同心之步搖履九珠合歡之鳳跣倚
翠華之輪妥紫玉之綬湘靈與素娥舉玉瑄而
吹太真與瑤姬和霓裳而舞觀漢上採真之神
媪顧堤邊拾翠之女郎肴獻八海之錯饌有江
芷之烹顏既醄而沉醉樂已洽而日橫命延車
以輟宴神悒愴而周張經九州而涉蒙汜入扶
桑而去茫洋騁羲和而上鰲頂憑虹霓而謁東
王凍雨冷而起掉遺䟽麻以贈將靈衣被被去
還無闕之境凝霧霏霏不知其所將

祭文

祭屠叔母老夫人

嗚呼哀哉飛電奔輪薜花朝露百歲匆匆寒暑
回互羣山蒼蒼白水湯湯珠沉南國月隱北邙
嗟我懿親奕世之珍克配華族佐翼良人紀綱
戶樞蘋藻虔持恩渥遐邇邇懍以令儀惟母女姪
實予子室結褵來歸黽勉循職壺教肅雍溫純
敏衷作嬪寒祚諄諄克恭骨肉厚誼深情莫替

如何仙輶忽焉遠逝緬想音容哀懷若劇追思
依依徘徊傷悲庶招楚些魂兮來歸嗟矣芳魂
幽幽暮昏松楸露淡寢篔無溫夙承睠顧殷勤
曉暮齋恨入冥縞車難赴一生若夢萬事都畢
靈几月寒素帷風入興嗟故人奄忽杳湮失此
良契慘焉傷神嗚呼哀哉虛堂閉兮蕙帳纈殘
妝黯兮玉樹折鸞鏡飛兮湘絃絕芳草萋兮王
孫咽鳴慈烏兮曉風冷珮環兮故宮奠一卮兮
椒馥庶神來兮空濛

祭庶母文

萬曆玄默困敦歲之陽月日在於房我庶母王
孺人以疾終於正寢其元女宜人率其子若孫
以藜藿之奠哭之於几筵而為楚些以招之曰
嗚呼哀哉清商變律玄冥乘轅空堦露冷北戶
寒屯室有婺姥一枕游魂孤幃晝掩銀缸夜昏
奄忽代謝天道寧論痛思成結欲挽無門歸來

歸來霧暗遙村嗚呼哀哉疇昔之歲偕我亡萱
意氣好合曾無間言愛同拊息誼比吹埴螽斯
有頌視彼姜嫄夙秉靜德何愠何嗔小星在御
肅肅溫溫年華委薜馨馥零蓀悲深玉篔怨起
秋原歸來歸來月峽猿吞嗚呼哀哉起滅二途
古聖難明既云無物四大何成熟為有體形影
誰并媿既早覺夙悟無生虛空照徹香界皈誠
五濁不染六塵併清蓮臺九品接引雙旌極樂

淨土入彼化城歸來歸來勿履幽程嗚呼哀哉
鉛華迅逝流景飛翺神隨景滅色併相傾灑然
一炁還歸太清杳冥昏默渺矣長征徘徊顧盼
曠宇空楹留連趙瑟悽愴秦笙松悲鶴去草亂
螢生愁雲四起慘月孤明我携幼弟長號失聲
緬瞻遺照爰想生平撫此几筵興思故情歸來
歸來享我尊羹嗚呼哀哉亂曰東生芻兮奠芳
椒白日沉兮風蕭蕭蘭房扃兮儀象設狸首斑

兮紅壁銷魂歸來兮樂逍遙乘青霓兮駕虹橋
引鸞車兮步層霄陰肅肅兮總幃飄寫哀詞兮
追冥冥傷我思兮心怊怊



絡緯吟卷之十二

東海徐媛小淑氏著

尺牘

與姑母夫人

朝來觀初日散影瑤光滿天白虹氤氳似起還
滅俯仰宇宙惻然動心人生如浮雲在天變遷
忽同阿閃寧使虛負有暇當過小園閑翫數日
披涼颼而攬素月啜清茗而坐翠陰致有佳趣

不日遣板輿奉迎幸勿見拒

與表妹邵夫人值予與妹俱旅白下

殘歲相催乖離日曠翹首東顧愴恨如何雲樹
之思中心彌結無以自遣徘徊庭際撫枕北牖
惆恍間與兒子入夢覺後援筆記就書似吾妹
解頤又寄懷二律尾後并呈斧削幸勿以效顰
見嗤悠悠路岐渺然故居永遠遠越沉思鬱紆
乘高眺遠山川據之嗟哉此情援翰唏噓

奉候叔母

比來揚子風多江陵雨濘積垢成涯流沙阻道
一片寢居幾成水國寂寞虛館秋色上裾念我
夫人渴如調饑日夕諄諄不去方寸所云日近
天涯遠斯言匪謬矣姪舉家辱大人羽覆之恩
高厚如泰山洪德隆情非寸管所能悉耳計與
夫人睽間以來更兩越秋矣流陰飛度疾於跳
丸姪此來準擬寄寓留都可得時聆台教渥飲

清飈壻家忽有鳩茲董權之役挈裝就道而我
大人又以鄉國之思舉檝南返晤會之期竟成
蕉鹿良可感嘆入秋來想吾大人道體更加清
勝暨各賢弟及諸夫人孫郎君愛闔宅禔福是
慰似吾諸弟俊才與華萼增芳川林競秀竟以
主者冬烘秋雲鍛翮然亦遲之歲月耳幸勿以
此縈思也炎威已去涼飈拂人乞大人早束輕
裝一鼓金陵之棹以慰姪喁喁至望溶弟在家
為人魚肉萬狀幸垂憐而救援之雙鯉南遊聊
裁短疏心與神俱曷勝戀注

訓子

兒年幾弱冠懦怯無為於世情毫不諳練深為
爾憂之男子昂歲六尺於二儀間不奮發雄飛
而挺兩翼日淹歲月逸居無教與鳥獸何異將
來柰何為人慎勿令親者憐而惡者快兢兢業
業無怠夙夜臨事須外明於理而內決於心鑽

燧之火可以續朝陽揮翮之風可以繼屏翳物
固有小而益大人豈無全用哉習業當凝神佇
思戢足納心驚精於千仞之巔游心於八極之
表濬發於巧心攄藻如春華應事以精不畏不
成形造物以神不患不為器能盡我道而聽天
命庶不媿於父母妻子矣循此則終身不墮淪
落尚勉之勵之以我言為箴勿憤憤於衷毋朦
朦於志

錄詞寄從弟夫人

適以客邸無聊春草生夢風霜驚骨追昔感今
不勝惆悵嘆枯蟬之殞桑感朝陽之晞露援筆
率成數語緣賤恙不任手書謹命代錄呈賢夫
人斧削

書仲容弟游棲霞寺詩後

吾弟幼負不羈才稱倚馬一介南中來館予舍
偕二三逸友策蹇登棲霞峰眺覽絕徑乘皓魄

歸來漏鼓高度潤染霜毫立就廿四韻精彩陸
離咄咄射目踈櫺殘影未移而花箋已雲爛矣
陳思王豈能推獨步乎白雪佳章青雲銳器此
行駿馬春花長安柳色冉冉炙官袍矣姮娥刺
錦端為少年工耶

與仲容弟

承賢弟薦匪他之誼媿鄙人之棠棣之誠雨雪
征途匆匆遽去旅窓瞻盼曷任依依寒侵板輿

得無良苦想日下已就高居承歡庭右玩珠掌
中阿翁稱快樂可知矣春來相釀調漿椒花獻
頌青韶媚序玉暖蘭閨欣羨欣羨別後擁爐草
成數語少將木桃之敬願邀明月之章錄似詞
壇一一塗抹是望

勗弟并呈諸母

予羈此已見涼月四圓矣家中百難糾紛非筆
端能悉惟有兩地相望飲泣含悲耳近知四弟

母氏以忿恨病劇諸母彷徨失措予念此攢心
哽咽天乎天乎何一旦墮此危機耶幸賴復蘇
弟孱弱之軀萬當自護以慰懸懸諸母亦宜調
攝愛養少解南北遙思但歲月屢更寸陰當惜
我弟年已漸長學業不可虛廢目今大厦傾頽
血產蠶食白晝攫金梧亭夜泣室多弔影之身
寢有未安之魄衆口嗷嗷朝夕未保百患蝟集
身危累卵無累繭之救援空秦庭之慟哭予日

切為痛心流涕者也况我先父母起自辛勤非
容易以至於此奕葉家聲能無一經相繼值此
困苦艱難尤當努力勿以過此一日復有明朝
不但有妨功業抑且慣習童心可為深慮此後
當黎明就館亭午一飯後即復至館趨理工程
日晷啣簷方可解館自非值大節序有正幹要
事更不許其延挨望諸母督令乳媪諸保各各
向前催促倘後幼主勤讀寸進自當記功獎賞

如阿諛嬉遊取媚求悅者有荒學業定擬罰治
惟諸母留神

寄叔母

行時白門徂秋已見塞腓春卉人生聚散儼若
蓬飄骨肉天涯興言思結不面吾孀母台顏兩
越歲矣想比來叔父母道履安和起居清吉暨
賢弟及弟夫人諸森枝各各迪勝姪作遠行之
身羈縻邊鄙發棹與魚鱉為羣攀榛與虺蛇為

伍瞻想音容迢遞五雲漂泊行人渺焉天末四
顧南津不識家山何在便淒然思不禁也自先
人背世遺棄孤兒弱女倉皇失措涸轍枯鱗虛
弦墮羽九死一生仰荷兩大人假之澤沛得仗
全皮骨即隕首剖肝何以酬德惟有日佩赤衷
未敢少忘於銘勒也姪行後不知孤弟家中作
何狀又兼以長途脩阻無復頻索音塵寧不心
旌摇摇柔腸九折哉終恐罽羅偏雁於微禽聞

闔風傾於細草念之淚如縈綆也幸有我大人
是賴獲使寒谷春回潛穎復起耳吾叔父聲華
高播廟堂必虛前席以待或天假其便剖符東
南使姪壻得陪後乘而姪猶能旦晚相傍更不
復有背飛之嘆矣遐荒無可為敬言之慙甚料
大人垂亮必不見罪也孤弟家居凡百望大人
羽覆之秣陵佳氣融和幸眠食適時珍重自愛
臨書不勝含戀之至

與董遐周表弟

金昌把袂楊柳如絲今桐花落滿銀床矣飛光
流駛黯然傷神天外王孫能不心旌搖曳轉盼
征車關山迢遞便欲哽咽耳兩承華扎慰存叮
嚀款曲出自滿腦肥腸自非一脉至情何能相
念若此令人且誦且悲不覺涕泗交睫也伏審
途次舟車安適玉體康勝深慰鄙懷捧誦來章
知壯遊行李生色江山入目便動綺思吟懷珠

玉琳琅奚囊已滿明月光
映陸離矣邇者文場
雄戰定奪錦標我外祖家聲
年來見彫於造物
所望展頭角光前業者在
吾弟一人以賢弟俊
秀鴻才視一第如承蜩弄丸
此時五色天章已
點朱衣綵筆寄來瑤篇如
傾國名花姿態橫出
大物定歸摩雲之手翹首
佳音喜可知也月初
偶得一夢若見賢弟瀕行
持一幅錦索予作贈
行詩錦上似有雲霞煥爛
題詠滿幅中間止月

字邊有空處予濫書四行
前二句已忘之止憶
後二句云夢裡不知身是
客吹來玉笛滿關山
醒時猶覺了了此夢甚奇
當是佳兆則吾弟高
捷神人已先示矣承示以
契達生之旨愁城都
付維摩處置肯哉斯言便
如浥清涼甘露足使
火宅生津但以蓬髮飄霜
未免桑榆之歎秋林
飛素殊深風木之悲佩服
嘉言更增悲感惟持
扇頭佳什披覽芳華出入
懷袖便覺俗障塵魔

灑灑拂去胸中磊砢都銷耳夏初禮天竺還承
賢夫人及大令嫂三令嫂夫人駕臨中路艤舟
竟日杯酒留連罄吐衷曲骨肉久別乍聚不覺
悲喜交集僧照亦依依膝前承母顏藹然如舊
似有夙根耳復承玳幣隆施感謝非可言喻嗣
後抵舍忽為寒風所中一病增劇卧床第者月
餘始稍稍就蘇今已全愈矣承念及便間附聞
吾弟旅寓蕭齋得無岑寂昭王臺下多士如雲

不審亦有知己作伴否長安早秋朔風侵人如
箭幸善自珍攝加衣強飯為禱尊堂及賢夫人
令嗣俱各各強勝勿勞遠念惟望努力明時高
捷賢書以慰北堂尊聞倚閭乃至頷也偶因便
羽聊附八行奉候冗次草草未悉厥衷